

काव्यशास्त्र

काव्यशास्त्र

डॉ. अमरेन्द्र

(पूर्व हिन्दी विभागाध्यक्ष, सी.एम.कॉलेज, बोंसी, बाँका)

डॉ. आभा पूर्वे

एम.ए. (गृह विज्ञान (गोल्डमेडलिस्ट) और हिन्दी), एम.एड., पी-एच.डी
(व्याख्याता, शिक्षा संकाय, सुन्दरवती महिला महाविद्यालय, भागलपुर)



ISBN : ९७८.८१.९७३६४०.९.९

प्रथम संस्करण

२०२५

सर्वाधिकार ©

लेखकाधीन

प्रकाशक

अंगिका संसद

सराय, भागलपुर

(बिहार)-८१२ ००२

E-mail : angikasansad@gmail.com

हरियाणा कार्यालय

वार्ड-३३, सेक्टर-२८

सरस्वती विहार, गुरुग्राम-१२२००२

मुद्रक

Das Printer

गोविंदपुरी, दिल्ली।

मूल्य

एक सौ पचास रुपये मात्र

Kavyashastra

By Dr.Amrendra/Dr.Abha Purbey

Rs.150/-

अंग-अंगिका लेली सम्पूर्ण रूप से समर्पित
नई पीढ़ी से विदूषी अंगिका पुत्री
डॉ. शोभा कुमारी
लेली!

प्राक्कथन

सोचलों तें यहा गेलों छेलै कि ‘काव्यशास्त्र’ हेनों आलोचना पुस्तक बनें, जैमें नै खाली भारतीय काव्यशास्त्र के विभिन्न संप्रदाय पर विस्तार सें विचार हुएँ, खाली रस के भेदे पर नै, रस निष्पत्ति के विभिन्न सिद्धान्त, रस दोष पर ही बात नै हुएँ, बलुक वक्रोक्ति सिद्धान्त, ध्वनि सिद्धान्त, औचित्य सिद्धांत साथें पाश्चात्य काव्यशास्त्र के प्रमुख विषय—कल्पना, बिम्ब, उपन्यास, काव्यभाषा—कें भी विवेचन के विषय बनैलों जाय।

मतर विद्यार्थीसिनी के लगातार माँग के कारण काव्यशास्त्र के आकार छोटों करै लें लागलै, तें कुछ विषयों कें इखनी अलग करै लें लगलै।

यैसैं है सोचना गलत होतै कि ई किताब लेली सोचलों रूप-रेखा स्मृतियों सें हटी चुकलों छै। ई प्रकाशन तें इखनकों संकट के निवारण लेली छेकै। समय ऐला पर ई काव्यशास्त्र अपनों मूल रूप में ही ऐतै, विश्वास करों!

लेखक द्वय

डॉ. अमरेन्द्र / डॉ. आभा पूर्व

विषय-सूचि

१. काव्य-लक्षण	६
२. काव्य-हेतु	१०
३. काव्य-प्रयोजन	११
४. काव्य गुण आरो एकरों भेद	१२
५. रीति	१४
६. काव्य-भेद	१५
७. दृश्य काव्य	१६
८. शब्द आरो अर्थ	१७
❖ संकेतग्रह के साधन/१७ ❖ शब्दशक्ति/१८	
९. रस	२२
❖ रस-संप्रदाय आरो प्रमुख आचार्य/२५ ❖ रस के वर्गीकरण/२७	
१०. अलंकार	३६
११. छंद विवेचन	४३
❖ अंगिका-छन्द-विवेचन/४३ ❖ कुछ लोकप्रिय हिन्दी छंद/५३	
१२. नाटक	५६
१३. पाश्चात्य संस्कृति	६६
❖ प्लेटो रों काव्य सिद्धांत/६७ ❖ अरस्तू रों अनुकरण सिद्धांत/६८ ❖ लॉगिनुस रों उदात्त तत्व/७० ❖ आई. ए. रिचर्ड्स/७२	
१४. आलोचना	७५
❖ आलोचक के प्रकार आरो गुण/७५ ❖ आलोचना के प्रकार/७६	
१५. बिम्ब योजना	
१६. प्रतीक योजना	८६
१७. नया गद्य विधा	९५
❖ निबंध/९५ ❖ कहानी-लेखन/९५ ❖ संस्मरण-लेखन/९६	
❖ ललित निबंध/९६ ❖ रिपोर्टाज/९६	
८ □ काव्यशास्त्र	

काव्य-लक्षण

जैमें बादल-बिजुली नाँखी शब्द-अर्थ रों मेल
किसिम-किसिम रों अलंकार के ठामे-ठामे खेल
कोय बात के कहीं दोष नै, गुण के झलकै रंग
छंद-लयो ठो होने आवै, जे रँ—होली-भँग
उपटै धार रसों के जैमें, दै आनंद अपार
ओकरै तें कविता कहै, सौँसे ई संसार ।

—‘काव्य-मणि’ सें

अर्थात् काव्य तें वही होय छै जैमें शब्द-अर्थ रों मेल रहें किसिम-किसिम के अलंकार सें अलंकृत रहें; वैमें गुण के समावेश रहें—दोष नै रहें, छंद-लय के सुंदर नियोजन रहें आरो जैमें अलौकिक आनंद कें दैवाला रस के समावेश रहें ।



काव्य-हेतु

गजुरावें पारें वही—जेकरा कहौ कवित्त
नैसर्गिक शक्ति बिना, पट होलों भी चित्त
तखनी ज्ञान रखें पारै छै कविता केरों मान
भले लोक या शास्त्र सें ऐलों रहें ऊ ज्ञान
सबसे बढियाँ रोज करों—लिक्खै रों अभ्यास
कविता रों गुण, भेद, रीति सब समझों तोरों पास ।

—‘काव्य-मणि’ सें

अर्थात् काव्य के हेतु (कारण) तें प्रमुख रूप सें शक्ति यानी प्रतिभा ही होय छै। तबें लौकिक ज्ञान या शास्त्र-ज्ञान प्राप्त करला के बाद भी काव्य-सृजन के प्रतिभा प्राप्त करलों जावें पारें। ई दू हेतु सें अलग, अभ्यास तेसरो कारण छेकै, जेकरा सें काव्य-ज्ञान अर्जित करलों जावें सकै छै।



काव्य-प्रयोजन

यश रों खातिर के पुरुख करै नै जग में काम
जेना कि किंछा करै लावै लें धन-धाम
केकरा सें मिलि जाय छै—यश आरो धन-धाम
करें नै लागै चाकरी, या केकरो कन काम?
केकरा सें भाँगटों हटै, मिलै वेभारिक ज्ञान
आनंदो ओतनै मिलै; नीति वचन रों ज्ञान?
ई सब एक्के सें मिलै जहाँ विराजै छंद
जहाँ नै कविता छंद छै—द्वार छवो के बंद!

—‘काव्य-मणि’ सें

अर्थात् यश, धन उपार्जन, भाँगटों के निवारण लेली, व्यवहार के ज्ञान,
आनंद रों प्राप्ति आरो सुन्दर उपदेश लेली कविता के सृजन होय छै।



काव्य गुण आरो एकरों भेद

जेकरा सें रस रूप धरै छै
जे रस कें रस लायक करै छै
ओकरै शास्त्री गुण बोलै छै
कवि के कविता कें तौलै छै ।

(१) माधुर्य

तीन लोक रँ, तीन काल रँ, गुण भी तीन
पहलों तें माधुर्य कहावै; मुरली-बीन
कहीं नै 'ट' वर्गों के, नै तें पंचम वर्ण
नै संयुक्त दिखावै, नजर घुमावों कन्हें
पढ़थैं हृदय भरै आनंदों सें, गुण हेनों
रौदैलों जेठों में झमझम बरखा हेनों ।

अर्थात् तीन किसिम के गुणों में माधुर्य कोय रचना के हेनों गुण होय छै, जेकरा में 'ट' वर्ग वर्ण के साथ सब्भे पंचम वर्ण के अभाव रहें; यैमें संयुक्त पद के भी अभाव रहै छै आरो हेनों रचना कें पढ़थैं आनंद सें हृदय भरी जाय ।

(२) ओज

जे गुण कें माधुर्य रीति नै भावै कुछुवो
ओकरों दिशा सें उलटे-उलटे एकदम चललों
'ट' वर्गों के साथें लेलें हाँसै-खेलै
जुड़लों अक्षर यैमें तें मछली रँ हेलै
एकरै सें तें दीप्ति विराजै एकरों मुँह पर
जना कि भगतों के हाथों में शोभै वामर ।

—'काव्य-मणि' सें

अर्थात् माधुर्य के विपरीत जे गुण 'ट' वर्ग के वर्ण आरो पंचम वर्ण पर अधिक निर्भर करै छै, हेनों गुण जे संयुक्ताक्षर, सामासिक पद पर निर्भर

रहै छै, ओज गुण कहावै छै ।

(३) प्रसाद

एकदम साफ सुफैय्यत कविता
नै अटका, नै मटका
कटियो टा नै देर लगै छै
अर्थ बुझै में झटका;
ई प्रसाद गुण के ही महिमा
ई गुण वहीं विराजै
कविता के दुनियाँ में बेसी
एकरे डंका बाजै ।

—‘काव्य-मणि’ सें

अर्थात् जे रचना के अर्थ समझै में जरियो टा दिक्कत नै हुएँ, वहाँ प्रसाद गुण होय छै ।

रीति

शब्दों रों विन्यास कहावै रीति-शास्त्र में
वैदर्भी, गौड़ी, पांचाली आवै यैमें
वैदर्भी में नै समास, जों मिलै तें कम-कम
गौड़ी में तें डेग-डेग पर नाँचै छम-छम
ओज गुणों में आवै जे-जे, सब एकरा में
गौड़ राज के गौड़ी के गुण छै केकरा में?
पांचाली तें बीच-बीच के मार्ग चुनै छै
अपनों-अपनों ढंग सें सब आनंद बुनै छै।

—‘काव्य-मणि’ सें



काव्य-भेद

आदि शास्त्र में भेद कहाँ कविता रों छेलै
भेद तें आगू चली कें होलै, जे भी भेलै
गद्य रहें कि पद्य कहलै कविते—कविता
ई भेदों के बादे में आवै छै सत्ता
छंदे वाला काव्य छिकै, बाकी तें गद्ये
उत्तम, मध्यम, अधम कहावै गुण रों मध्ये
जे छंदों पर चलै—कहावै श्रव्य काव्य ऊ
की प्रबंध, की मुक्तक; छेकै यही काव्य दू।
फेरु प्रबंधो महा-खंड में बदली जाय छै
लक्षण छै, तभिये तें हेनों नाम धराय छै
महाकाव्य में मिली-जुली कै लक्षण आवै
कथा, सर्ग, वर्णन के साथें लक्ष्यो भावै
महाभाव, पुरुषार्थ कहों कि कुछुवो बोलों
सब कुछ बान्ही-बून्ही कें ही एकरा तौलों
छूटै नै छोटको खिस्सा, नै छंद तरीका
नवो सर्ग के आखिर में लै बदली टीका
बुझले होवों बात, बिना कुछ आरो कहले
खतम करौं ई बात, कही दौं एकरों पहले
खंडकाव्य में खंड कथाहै सदा विराजै
जे बुझै ई बात—डमरूवे नाँखी बाजै।
मुक्तक तें मुक्तक ही छेकै, एक भाव के
एक नदी, इक नाविक आरो एक नाव के।



दृश्य काव्य

दृश्य काव्य ऊ छेकै जैमें अभिनय आवै
पात्रे नै, संवादो वाला कथा कहावै
क्रिया, कहानी, संवादों पर टिकलों नाटक
झलकी आवै मंच पात्र सँ खूब झकाझक
पात्र-अंक के भेदों सँ नाटक भी दस गो
दोनो हाथों के औंगरी रँ, नाँचों बिट्टो ।



शब्द-अर्थ-संबंध

शब्द आरो अर्थ के संबंध स्थापित करावै में संकेतग्रह, आवाय-उद्वाय आरो बिम्ब-निर्माण के मुख्य भूमिका होय छै। ई पारिभाषिक शब्द सिनी के समझी लेनाहौ जरूरी छै :

(१) संकेतग्रह :

सब भाषा में प्रत्येक शब्द केरो कोय निश्चित अर्थ होय छै। तें कोय शब्द सँ कोय अर्थ के संबंध स्थापित करवों 'संकेतग्रह' कहावै छै। कोइयो भाषा के शब्द के जे अर्थ होय छै, ऊ संकेतित हुऐ छै; ई संकेतित अर्थ स्वेच्छा-जन्य भी हुऐं पारें आरो यादृच्छिक भी। कोय-कोय व्यक्ति अपनों इच्छा सँ कोय अर्थ लें कोय शब्द के प्रयोग करै छै, मतर ज्यादातर यहा होय छै कि कोय विशेष अर्थ लें ही कोय शब्द के प्रयोग लोक में हुऐ छै।

(२) आवाय-उद्वाय :

कोय शब्द के बनलौ रहलै पर कोय अर्थ बनलौ रहें, ऊ आवाय (अन्वय) छेकै आरो जे शब्द के नै होला पर अर्थो नै रहें, ऊ उद्वाय कहैतै। आवाय-उद्वाय पद्धति सँ ही बालक कोय शब्द के अर्थज्ञान प्राप्त करै छै।

(३) बिम्बनिर्माण :

मनोवैज्ञानिक के मोताबिक प्रत्येक शब्द के चित्र मनुष्य के मस्तिष्क में सुरक्षित रहै छै, जे चित्र ऊ शब्द के साथें जागृत होय जाय छै। कोय शब्द के अर्थज्ञान के पीछू यही बिम्बनिर्माण काम करै छै।

संकेतग्रह के साधन

संकेतग्रह के निम्नांकित आठ साधन मानलौ गेलौ छै—(१) व्याकरण, (२) उपमान, (३) कोश, (४) आप्त वाक्य, (५) व्यवहार, (६) व्याख्या, (७) विवृति, (८) प्रसिद्ध पद सँ सानिध्य।

यै सब में व्याकरण-कोश के महत्व तें सर्वविदित छै; अर्थज्ञान

करावै में उपमान आरो आप्त वाक्य भी कम भूमिका नै निभावै छै। उपमान सादृश्य विधान छेकै, जबै कि आप्त के मतलब यथार्थवक्ता होय छै। गुरु, वेद आरनी यही कोटि में ऐतै।

हेन्है केँ लोक व्यवहार सँ ही अधिक-सँ-अधिक शब्द के अर्थ ज्ञान प्राप्त करै छियै, मतर वाक्यशेष यानी प्रसंग या प्रकरण से भी कोय शब्द के अर्थज्ञान होय छै, है निर्विवाद छै।

व्याख्या सँ तें अर्थज्ञान होवे करै छै, प्रसिद्ध पद के सानिध्य सँ भी अर्थ के ज्ञान होय छै; जेना—सुधा के अर्थ अमृत होय छै, तें चूना भी होय छै। जबै भवन के साथें सुधा के प्रयोग होतै, तें ऊ चुनाहै के संबंध में होतै।

शब्दशक्ति

शब्द के अर्थ बताय में शब्दशक्ति के भी प्रमुख भूमिका होय छै।

तें शब्द की छेकै? ई ध्वनि समूह के योग छेकै आरो ई योग सँ हम्में जे समझै छियै, वही अर्थ छेकै। काव्यशास्त्र में शब्द के बोधक आरो अर्थ के बोध्य नामों सँ जानलों जाय छै। बोध्य यानी जेकरों बोध हुएँ। तें, प्रश्न उठै छै कि कोय शब्द के अर्थ केना प्राप्त होय छै। ई भाषाविज्ञान के भी विषय छेकै। तें सबसें पहलें हमरा ई जानी लेना चाहिँ कि ई कोय जरूरी नै छै कि कोय शब्द एक्के मानी दै छै। एक शब्द के ढेर अर्थ हुएँ पारें। ओकरों सही अर्थ पावै के कै आधार होय छै। जेना : के बोलै छै? केकरा बोलै छै? कखनी बोली रहलो छै? कहाँ बोली रहलो छै? आरनी-आरनी।

उदाहरण लेली एक शब्द 'गधा' ही लेलों जाय। एकरों सीधा-सीधा अर्थ पशु विशेष होय छै। मतर कोय आदमी के गधा कहला पर एकरों सीधावाला अर्थ बदली केँ मूर्ख होय जाय छै। तें, एकरा सँ स्पष्ट होय छै कि एक शब्द के एक्के मानी नै होय छै, ढेर मानी होय छै। तें कोय शब्द के कोय विशेष अर्थ केना केँ प्राप्त होय छै। ऊ प्राप्त होय छै शब्द केरों शक्ति सँ, जे शब्द-शक्ति कहावै छै। ई शब्द शक्ति तीन किसिम के होय

छै :

१. अभिधा
२. लक्षणा
३. व्यंजना

आरो यहा तीन शक्ति के कारण शब्द भी तीन किसिम के होय जाय छै :

१. वाचक
२. लक्षक
३. व्यंजक

शब्दशक्ति से प्राप्त तीनो किसिम के अर्थ कें :

१. वाच्य
२. लक्ष्य
३. व्यंग्य

कहलौ जाय छै ।

अभिधा शब्दशक्ति : शब्द के जोन शक्ति सें शब्द के प्रसिद्ध अर्थ मिलै छै, ऊ अभिधा कहावै छै आरो ई तें जानले बात छेकै कि प्रत्येक शब्द के कोय-न-कोय प्रसिद्ध अर्थ होय छै जे शब्द सुनथैं ऊ प्रसिद्ध अर्थ हमरों सामना प्रकट होय जाय छै, जेना बाघ कहला से एक पशु विशेष के अर्थ हमरा मिलै छै, तें यैमें प्राप्त प्रसिद्ध अर्थ दैवाला शब्द वाचक छेकै, प्राप्त अर्थ वाच्य आरो ई अर्थ प्राप्त करावैवाला शक्ति अभिधा कहावै छै ।

लक्षणा शब्दशक्ति : मुख्य अर्थ के बोध होला पर रूढ़ि या प्रयोजन के कारण मुख्यार्थ वाच्य सें भिन्न अर्थ के बोध करावैवाला शब्द-शक्ति कें लक्षणा कहलौ जाय छै । तें एकरा सें प्रकट होय छै कि लक्षणा में चार बात प्रमुख होय छै :

१. मुख्यार्थ में बाधा
२. मुख्य अर्थ से अलग कोय अलग अर्थ के ज्ञान
३. अन्य अर्थ के मुख्य अर्थ सें संबद्धता
४. भिन्न अर्थ के प्रतीति में रूढ़ि या प्रयोजन के सक्रियता ।

चाहे रूढ़ी रहे आकि प्रयोजन, मुख्यार्थ से ओकरों संबंध केन्हौ के नै कटें पारें; नै तें प्रयोजन के आधार पर आकाश के अर्थ पाताल लगावें लगतै। मुख्यार्थ आरो गौणार्थ में अन्तरसंबंध होना जरूरी छै। रूढ़ आरो प्रयोजन के आधार पर लक्षणा के दू भेद होय छै :

१. प्रयोजनवती लक्षणा

२ रूढ़ लक्षणा

आगू चली केँ प्रयोजनवती लक्षणा के भी दू भेद मानलौ गेलौ छै :

१. गौणी

२. शुद्धा

सादृश्य संबंध में जहाँ गौणी लक्षणा होय छै, वहाँ अन्य संबंध के कारण शुद्धा लक्षणा। ई दोनो के एक-एक उदाहरण नीचे छै :

१. ओकरों मुंह चाँद छेकै—यहाँ सादृश्य-संबंध छै।

२. वैं हाथों सेँ लिखलकै—यैठां सादृश्य सेँ अलग आधाराधेय भाव छै। हाथ लिखें नै पारें, कलम हाथों में रहै छै तें एकरों प्रयोजनार्थ कलम सेँ लिखलकै ही होलै।

३. सारोपा लक्षणा

४. साध्यवासना लक्षणा

जहाँ उपमेय-अपमान के आरोप रहें वहाँ सारोपा लक्षणा होय छै आरो जहाँ साध्य के लोप रहें वहाँ साध्यवासना लक्षणा होय छै।

दोनो के उदाहरण निम्नांकित छै :

१. ‘ऊ ते गौ छेकै।’ यै ठां गौ के सीधापन आरोपित छै

२. जो केकरौ देखी केँ ई कहलौ जाय, ‘आवों नारद जी’ तें यैठां प्रस्तुत उपमेय नै रहला के कारण साध्यवासना लक्षणा छै।

लक्षणा के आरो भेद हुँ पारें, जेना, उपादान लक्षणा आरो लक्षण लक्षणा। कहै के तें ढेर भेद आचार्य नैं बतैलें छै।

व्यंजना शब्दशक्ति : अभिधा आरो लक्षणा शक्ति सेँ बाहर के अर्थ जो शक्ति खोजी निकालै छै, वही व्यंजना शक्ति छेकै। व्यंजना शक्ति सेँ प्राप्त होयवाला अर्थ केँ व्यंजक कहलौ जाय छै। एकरा एक उदाहरण सेँ

समझलौं जावें सकै छै। जों ई कहलौं जाय कि साँझ होय चललै, तें व्यंजना शक्ति सें एकरो अर्थ निकलतै कि सँझवाती दै के समय होय गेलै। व्यंजन शक्ति के भी दू भेद होय छै :

१. शाब्दी व्यंजना

२. आर्थी व्यंजना

शाब्दी व्यंजना वैठां होय छै, जैठां अनेकार्थी शब्द रहें आरो आर्थी व्यंजना वैठां होय छै, जैठां एकार्थी शब्द रहें।

शाब्दी व्यंजना के उदाहरण प्रस्तुत छै :

सोहत नाग न मद बिना तान बिना नहीं राग।

यैठां नाग आरो राग के कै एक अर्थ हुएँ पारें मतुर जे मद आरो तान सें निमंत्रित छै।

आर्थी व्यंजना में शब्द विशेष के कोनो चमत्कार नै रहै छै। प्रसंग सें ई व्यंजना उभरै छै जेना कोय स्त्री सें ओकरो पति के बारे में कोय आरो जनानी संबंध जानै लें चाहै आरो पति के साथ जनानी खाली मुस्काय दै, तें ई मुस्कान सें ही ई व्यंग्यार्थ निकलै छै कि हिनी हमरो पति छेकै। यहाँ व्यंजक शब्द पर निर्भर नै छै।



रस

जों रसोनुकूल शैली (वर्ण-विन्यास) नै हुएँ आरो नै तत्व, तें रचना आपनों अपेक्षित प्रभाव नै छोड़ें पारै छै।

भाव, विभाव, अनुभाव, संचारी भाव

चित्त में स्थिर रूप से रहैवाला भाव ही स्थाई भाव छैकै, जे भाव नौ किसिम के मानलों गेलों छै :

- (१) रति (प्रेम) - अनुकूल वस्तु के प्रति आकर्षण
- (२) हास - विकृत वेष भूषा से उत्पन्न उल्लास।
- (३) शोक - प्रिय वस्तु के विनाश से उत्पन्न विकलता
- (४) क्रोध - प्रतिकूल के प्रति मन से उग्रता
- (५) उत्साह - कोय कार्य करै के संकल्प
- (६) भय - उग्र वस्तु के कारण उत्पन्न चित्त से विकलता
- (७) जुगुप्सा - अनिच्छित वस्तु के प्रति घृणा
- (८) विष्मय - असाधारण वस्तु के कारण मन में उत्पन्न आश्चर्य।
- (९) निर्वेद - तत्वज्ञान से उत्पन्न संसार के प्रति वैराग्य

स्थायी भाव

१. रति

२. हास

३. शोक

४. क्रोध

५. उत्साह

६. भय

७. जुगुप्सा

८. विष्मय

९. निर्वेद

रस

शृंगार

हास्य

करुण

रौद्र

वीर

भयानक

वीभत्स

अद्भुत

शान्त

विभाव

स्थायी भाव के उत्पत्ति के कारण विभाव छेकै, जेकरों दू भेद छै :

(१) आलंबन

(२) उद्दीपन

आलंबन विभाव ऊ छेकै जेकरों वास्तें स्थायी भाव उत्पन्न होय छै ।

उद्दीपन विभाव ऊ परिस्थिति छेकै जे उत्पन्न स्थायी भाव कें उद्दीप्त करै छै ।

अनुभाव

मन के भाव कें बतायवाला शारीरिक चेष्टा ही अनुभाव कहावै छै, जे भाव के बाद उत्पन्न होय छै, यही सें ई अनुभाव छेकै । यहू दू किसिम के होय छै :

(क) कायिक

(ख) सात्विक

कायिक अनुभाव शारीरिक चेष्टा छेकै जे प्रयास सें भी उत्पन्न होय छै, मतर सात्विक भाव बिना प्रयास के उत्पन्न होय छै । ई सात्विक भाव आठ किसिम के मानलें गेलें छै :

- स्तंभ - शारीरिक चेष्टा के रुकवों
- स्वेद - घाम ऐवों
- रोमांच - रोआँ खड़ा होवों
- स्वर भंग - बोली लड़खड़ैवों
- कंप - काँपवों
- विवर्णता - देह के रंग फीका पड़वों
- अश्रु - लोर ऐवों
- प्रलय - अचेत होवों

संचारी भाव

ऊ चित्तवृत्ति जे स्थिर नै रहें, वही संचारी भाव छेकै। संचारी भाव के संख्या तैंतीस मानलौं गेलौं छै :

- (१) हर्ष : मन रौं खुशी
- (२) विषाद - उद्यमहीनता
- (३) त्रास - भय
- (४) लज्जा - लाज
- (५) ग्लानि - कुकर्म के कारण होयवाला खेद
- (६) चिंता - मन रौं सोच
- (७) शंका - अनिष्ट रौं संभावना
- (८) असूया - असहिष्णुता
- (९) अमर्ष - दुख
- (१०) मोह
- (११) गर्द
- (१२) उत्सुकता
- (१३) उग्रता
- (१४) चपलता
- (१५) दीनता - तेज रौं अभाव
- (१६) जड़ता - विवेक शून्यता
- (१७) आवेग
- (१८) निर्वेद - अपना कें धिक्कारवौं
- (१९) धृति - स्थिर चित्त
- (२०) मति - विवेक संपन्न
- (२१) विवोध - बोध संपन्न
- (२२) वितर्क - विचार
- (२३) श्रम - थकान
- (२४) आलस्य - उत्साहहीनता
- (२५) निद्रा
- (२६) स्वप्न

- (२७) स्मृति - कोय बातों के याद ऐवों
- (२८) मद - मोह आरो आनंद के स्थिति
- (२९) उन्माद
- (३०) अविहत्या - गोपनीय भाव
- (३१) अपस्मार - मूर्छा
- (३२) व्याधि - रोग
- (३३) मरण - मृत्यु

काव्य-दोष

काव्य के आनंद में जे बाधा उपस्थित करें, वही दोष छेकै। दोष तीन किसिम के होय छै :

- (१) शब्द दोष
- (२) अर्थ दोष
- (३) रस दोष

शब्द दोष वहाँ होय छै, जहाँ कोय शब्द या वाक्य सुनै पढ़ै के क्रम में उद्वेग पैदा करै।

अर्थ दोष वहाँ होय छै जहाँ प्राप्त अर्थ उद्वेग पैदा करै।

रस के ग्रहण करै में जहाँ विलम्ब हुए, वहाँ रस दोष होय छै।

रस-संप्रदाय आरो प्रमुख आचार्य

‘साहित्यालोचन के सिद्धांत’ में डॉ. रविन्द्रनाथ जैन नें लिखलें छै कि होना कें भरत मुनि नें रस-निष्पत्ति लैकें जे विचार रखलें छै, ऊ बहुत साफ-सुथरा रहला के बादो, बाद के आचार्य भरत मुनि के रससूत्र में ऐलों संयोग और निष्पत्ति शब्द लैकें अपनों-अपनों मत रखलकै, जेकरों संख्या तें दस सें ऊपरे कहलें जाय छै, मतर वैमें चारै मत प्रमुख आरो लोकप्रिय छै, जे मत ओकरो आचार्य के नाम पर जानलें जाय छै। नीचें चारो आचार्य के रस-संबंधी मान्यता के उल्लेख करलें जाय छै।

भट्ट लोल्लट के उत्पत्तिवाद

रस-निष्पत्ति के संबंध में आचार्य भट्ट लोल्लट के ई मान्यता छेलै कि रस के स्थिति तें मुख्य रूप सें राम आरनी मुख्य पात्रे में होय छै, मतर कि आरोपित होय कें ऊ नटो में आवी जाय छै आरो जे दर्शक कें भी चमत्कृत करी दै छै। ई आचार्य के मतानुसार—विभाव आरो रस में कार्य-कारण के संबंध होय छै, जेकरों प्रतीति कुशल अभिनेताओं में हुएँ लगै छै आरो नट में ही मूल नायक के आरोप के कारण रस-निष्पत्ति होय जाय छै।

आलोचक नें ई मत के सबसे बड़ों कमजोर पक्ष ई बतैलें छै कि यहाँ ई बातों पर विचारे नै होलों छै कि अभिनेता में रसानुभूति केना होय छै आरो दर्शको केना चमत्कृत होय उठै छै?

शंकुक के अनुमितिवाद

आचार्य शंकुक नें भट्ट लोल्लट के सिद्धान्त कें आगू बढ़ैतें कहलें छै कि नट में अनुकार्य के समस्त क्रिया आरो रसांग के परिपाक देखी दर्शक ओकरा सें बेहद प्रभावित होय, अनुमान के बलों पर रसास्वादन करै छै।

आचार्य शंकुक के मत के विरोध खास करी कें ई बातों कें लैकें होलों छै कि अनुमान तें ज्ञान के विषय छेकै, आरो रस मनोदशा के—यै स्थिति में दोनो के संगति केना बैठैलों जावें सकै छै? फेनु अनुमान तें अप्रत्यक्ष हुऐ छै, तें जैसे रसदशा केना उत्पन्न हुऐ पारें। आरो एक बात छै कि अनुमान तें गलतो हुऐ पारें। यही सब बातों कें लै आचार्य शंकुक के रस-संबंधी मान्यता भी निर्दोष नै मानलों गेलै—ई अधिकांश विद्वानों के मत छेकै।

आचार्य भट्ट नायक रों रस-सिद्धांत

आचार्य भट्ट नायक नें रस के स्थिति दर्शक में मानतें हुऐ कहलें छै कि मूल भाव जे आलंबन के प्रति नायक में होय छै, ऊ दर्शकों कें केना हुऐ पारें, मतर भाव के साधारणीकृत होय गेला के बाद ऊ दर्शकों के आनंद के कारण बनी जाय छै। आचार्य भट्ट नायक नें रसानुभूति लेली

तीन स्थिति दिस संकेत करलें छै, जे निम्नांकित छै :

- (१) अभिधा
- (२) भावकत्व
- (३) भोजकत्व

यैमें अभिधा शक्ति सें दर्शक आकि पाठक घटना के खाली स्थूल स्थिति कें जानें पारै छै। दोसरों स्थिति में स्थूल प्रतीति भावकत्व में बदली कें विस्तृत होय जाय छै आरो तेसरों स्थिति में आवी कें दर्शक सब्भे सांसारिक बंधन सें मुक्त होय कें भाव के भोग करें लागै छै, यहा रसानुभूति छेकै।

अभिनव गुप्त के अभिव्यक्तिवाद

आचार्य अभिनवगुप्त के रस-संबंधी विवेचन अभिव्यक्तिवाद के नामों सें जानलें जाय छै। हिनी आचार्य भट्ट नायक के भावकत्व यानी साधारणीकरण के पहिलों दाफी ठोस वैज्ञानिक तौर पर स्पष्ट करलें छै। आचार्य गुप्त के मोताबिक दर्शक के हृदयस्थित मनोविकार, जे वासना रूप में स्थिर होय छै, वही विभाव, अनुभाव, संचारी भाव सिनी सें जागृत, उदीप्त आरो गतिशील होय के साथे साधारणीकृत होय के रसास्वाद के अवस्था प्राप्त करी लै छै।

ई बातों सें स्पष्ट होय जाय छै कि दर्शक में वासना रूपों में स्थित स्थायी भाव ही रसांग सें पुष्ट होय के सामाजिक (दर्शक) में आनंद (रस) के कारण बनी जाय छै। कहै के मतलब ई छेकै कि सामाजिक/दर्शक/पाठक के ही स्थायी भाव अनुकूल स्थिति पावी कें रस-रूप में अभिव्यक्त होय उठै छै।

रस के वर्गीकरण

शृंगार रस :

‘दशरूपकम्’ के लेखक आचार्य धनंजय के अनुसार शृंगार रस के स्थायी भाव रति होय छै आरो नायक-नायिका एकरों आलंबन विभाव के अंतर्गत आवै छै। आलंबन विभाव के शृंगारिक चेष्टा, प्राकृतिक सौन्दर्य आरनी ई

रस के उद्दीपन विभाव छेकै, जबैकि आलिंगन-चुंबन आरनी अनुभाव होय छै। लज्जा, हर्ष, चिंता, उत्सुकता आरती एकरों संचारी भाव छेकै।

शृंगार रस के एक उदाहरण नीचें छै :

सच तोहरे बात लेली
हम्मैं एक असकली लइकी
रात के ई सुन्नो बियाबान बेरा में
चानन नदी पार करी कें
डोर, लाज आरो भय कें कोची में समेटी कें
ई पीपरो गाछी ठियां ऐलों छी
की कहियौं पिया
कोस भर नदी के बालू
वहा रं उमतैली हम्मैं पार होय गेलियै
जेना हिरनी
अपनो कस्तूरी गंध सें मतैली
बाघों के आगू सें पार होय जाय छै।

—‘कागा की संदेश उचारै’ सें

करुण रस

आचार्य धनंजय के ही मोताबिक करुण रस के स्थायी भाव शोक छेकै आरो जेकरों लें शोक हुए ऊ आलंबन छेकै। जेकरों लें शोक होय छै, ओकरा सें जुड़लौ चीज सिनी ही उद्दीपन कहावै छै आरो अनुभाव होय छै—छाती पीटवों, हँकरवों, मूर्छित होवों आरनी। संचारी होय छै—एकरों स्मृति, चिंता, आवेग आरनी।

बाबू के मरथैं मय्यो रों हालत बड़ी विचित्र
घंटा-घंटा भर भीती पर लिखलौं लागै चित्र
कभी कहै छै, ‘दौड़ें बेटा, बाघ उतरलौ छौ रे
जो-जो रे बीजुवन बेटा, बाप गेलौ छौ भोरे
‘तोहरो बाबू रे बेटा नेहो रों अजगुत खान
हमरो सुख नै देखलौ गेलै, दुष्ट भेलौ भगवान’
कुछ-सेँ-कुछ फदकै, बोलै छै, हालत बड़ी विचित्र
घंटा-घंटा भर भीती पर लिखलौं लागै चित्र

ठाँय-ठाँय ठोकै चोखटी सँ घुरी-घुरी माथों कें
 लपकीं छाती पर पटकै छै पीटनैं रँ हाथों कें
 दौड़ी कें गेना रों गल्ला सँ लिपटै छै माय
 दुख सँ चीखै रही-रही कें; जों, रम्भाबै गाय
 गुदड़ी-गुदड़ी करी लेलें छै चेथरी-चेथरी साड़ी
 चूल नोची कें धामिन लागै; आँख निरासै फाड़ी
 सौ विधवा रँ असकल्ले ही माय कानै छै, कुहरै

—‘गेना’ सें

हास्य रस

हास्य रस स्थायी भाव : हास छेकै आरो विचित्रतापूर्ण वस्तु,
 जेकरा देखतहैं हँसी आवें ऊ आलंबन कहावै छै। एकरों बेढंगों कार्य,
 संवाद, आवाज आरनी उद्दीपन होय छै आरो अनुभाव होय छै—ठोरों के
 फैलवों, आँखों के छोटों पड़वों आरनी। ई रस के संचारी भाव छेकै :
 हँसी, जिज्ञासा आरनी

हास्य रस रों उदाहरण :

जीवों में प्रधान, बुद्धिमान, शक्तिमान, रक्तबीज खानदान
 तोरा डरें काँपवै-जहान, जै हो मच्छड़ भगवान !
 सब्भै जीवों कें तोहें एक्के रं देखै छों
 सब्भै जग्घा में तोहें एक्के रं घूमै छों
 सर्वव्यापी आरो समदर्शी महान ! जै हो....
 राग-रागिनी के तों ज्ञाता बेजोड़ छों
 लोकगीत, गजलो सुनावै निन्द-तोड़ छों
 लहुवे टा श्रोता सें लै छों तों दान ! जै हो....
 गावी-गावी कीर्त्तन दिलवावै छों ताली
 आठो आङ्गे ताली दै छौ पढ़ी-पढ़ी गाली
 महिमा तोरों लीला के, करें बखान ! जै हो....
 भरमाय छों हीरो रं दै-दै सीटी-नारा
 हर दिन एक चुम्मा में गिनवावै छों तारा
 गिनथैं-गिनथैं तारा, होय जाय छै विहान ! जै हो....
 डाक्टर धुरंधर धन्वन्निहो के बाप छों

रोगी-निरोगी के इलाज करै छाथ छों
 सुइया चुभाय खून खीचै छों दोनों में समान ! जै हो....
 वही जनम सें आगा या सूदखोर सेठ छों
 लहुवे टा चुसी-चुसी आपनों भरै पेट छों
 जत्तें छिटै फ्लिट डीडटी ओत्तें बढ़ें प्राण । जै हो....
 मच्छड़ प्रभु ! देश में तोरे भरमार छै
 शोषण-व्याभिचार के सजलों बाजार छै
 'मधुकर' छै मुक्ति लेली लोग परेशान ! जै हो....
 —श्री जगदीश पाठक 'मधुकर'

अद्भुत रस

अद्भुत रस रों स्थायी भाव विषय आरो आलंबन कोय अलौकिक आकि आश्चर्यजनक वस्तु या कार्य होय छै । अलौकिक वस्तु के विविधते अद्भुत रस के उद्दीपन कहावै छै आरो रोमांच, आँख फाड़ी या टकटकी लगाय कें देखवों अनुभाव छेकै, वहीं उत्सुकता, हर्ष आरनी संचारी भाव छेकै । एक उदाहरण :

बहै छै हवा रेशमी गुदगुदाबै
 कली कें दै किलकारी-चुटकी खिलाबै
 खिली गेलों फूलों कें चूमै-हँसाबै
 बिना झूला के ही दै धक्का झुलाबै
 हिलाबै छै झोली कें आमों रों ठारी
 कभी देखी आबै छै सरसों रों क्यारी
 छुवै फूल हौले बड़ी डरलों-डरलों
 कहीं हरदियानों रँ बिरनी ही अड़लों

डरी कें उड़ै, तें ऊ तितली तक पहुँचै
 बड़ी गुदगुदों देह पाबी कें हुमचै
 कहीं जोगबारिन रों आँचल कें छूवी
 कभी ओकरोँ गालों रों गड़ढा मेँ डूबी
 बढ़ावै छै विरहा रों आगिन कें आरु

—'गेना' सें

रौद्र रस

रौद्र रस के स्थायी भाव क्रोध छेकै आरो जेकरा पर क्रोध हुएँ, ऊ एकरों आलंबन छेकै, जबैकि हेनों पात्र के अनटेटलों बोली, व्यवहार ही उद्दीपन कहैतै। दाँत के पिसबों, आँख के लाल होवों आरनी अनुभाव छेकै आरो गर्व, उग्रता आरनी संचारी भाव। रौद्र रस के एक उदाहरण प्रस्तुत छै :

जों जालों सें शेर दहाड़ै
काँपी जाय छै गाँव-जवार,
बेहोशी में गरजी जाय छै
होने गोपो कभी-कभार।

जे दहाड़ सुनथैं बाँका में
लागी गेलै भीषण आग,
जहाँ-जहाँ भी राग विलावल
वहाँ-वहाँ ही भैरव राग।

अंगरेजी सत्ता के जेना
रहतै कहीं नै नामो लेश,
सुनथैं खबर गोप छै बंदी
खौली उठलै अंग प्रदेश।

—‘शहीद सम्राट महेन्द्र गोप’ सें

वीभत्स रस

जुगुप्सा यानी घृणा वीभत्स रस के स्थायी भाव छेकै, आरो दुर्गन्धयुक्त वस्तु आकि घृणायोग्य कोइयो चीज एकरों आलंबन छेकै, वहीं हेनों वस्तु पर मक्खी आकि गिद्ध आरनी के झपटवों उद्दीपन विभाव कहैतै, तें नाक-मूँ सिकोड़वों, थूकवों आरनी अनुभाव कहैतै, जबै कि आवेग, निर्वेद आरनी संचारी भाव। वीभत्स रस के एक उदाहरण प्रस्तुत छै :

बहै छै कहीं पें धार लेहू करों; जोरी हेनों
वही ठां दिखावै कतें सैनिकों के लाश छै

केकरो तें हाथे गैब, केकरो तें मुंडिये छै
जहाँ-जहाँ आदमी छै, भेड़ियो ठो पास छै
मौन करै तेजी चलौं—घरे के की, दुनियौ के
जहाँ गिद्ध-कुत्ता केरौ, रुधिर के रास छै
घाव सें घवैलौं देह, की जकां दुर्गन्ध करै
जीत्तो रं आदमी ही कागा केरौं ग्रास छै।

—स्वरचित

भयानक रस

भय ही भयानक रस के स्थायी भाव होय छै आरो जेकरा सें भय
हुएँ, ऊ प्राणी आकि कोइयो वस्तु एकरौं आलंबन कहैतै। डरावना जग्घौं,
डरावना प्राणी के हाव-भाव उद्दीपन छेकै, थरथरैवौं, चीखवौं आरनी
अनुभाव होतै, वहीँ पर आवेग, चिंता, मोह आरनी एकरौं संचारी भाव
छेकै। एक उदाहरण :

आँधी केँ देखै लेँ आरो परहेज लेँ,
आबेँ जरूरी छै—खिड़की पर काँच लगै ।

की रँ लहरावै छै बाहर में बिन्डोबो
धरतीं उड़ावै छै—धुरदा—कोबो—कोबो,
एकदम तपासलौ लू देह—मुँह झौंसै छै
बुतरू केँ जेना कोय अंगुलीमाल धौंसै छै
निर्दय—निर्मोही समय भेलै हेने कसाय,
बाँही पर कड़कड़ाय जेना कि पाँच लगै ।

है रँ बतासौ में गिद्धा रौ मौज छै
भाँड़ी में हकहक कबूतर रौ फौज छै
काठौ रँ मौन, दीया दुखौ रौ चाटै छै
तहियो करेजौ नै देवो रौ फाटै छै
हेनो समाजो केँ, धरम-धर्मराजो केँ
कथी लेँ जीत्तो छै ? आँच लगै ।

—‘कुइयाँ में काँटो’ सें

शांत रस

शांत रस के स्थायी भाव निवेद छेकै, आरो वस्तु के क्षणभंगुरता, निःसारता आरनी एकरों आलंबन। सत्संग, संन्यास, तीर्थाटन आरनी जों एकरों उद्दीपन छेकै, तें सांसारिक वस्तु के ओरी सें विराग, चिताग्रस्त रहवों अनुभाव के अन्तर्गत ऐतै। वहीं पर स्मृति, धृति आरनी संचारी भाव। कोय पूर्व विषय कें याद करवों ही स्मृति छेकै, जबैकि चित्त के चंचलता के अभाव धृति कहावै छै। शांत रस के एक उदाहरण प्रस्तुत छै:

खसलों जाय जिनगी रों होने सब साल
जेना ओहारी सेँ बरसा रों बुन।

कत्तेँ सजैलाँ ऊ नीनों के सपना
मुट्ठी में सौंसे समुन्दर के अँटना
लोंर-जोंर, आपनों-पराया—परैलै
हाथों में चुरूवे भर पानी-टा ऐलै।

आँखी में आवै छै एक्के टा फोटू
विलखै अयभाती—नै पावी सगुन।

जोड़ी-जोड़ी केनखों जे घोसला बनैलाँ,
आरो ओघरावै लेँ सँझकी जे ऐलाँ,
जिनगी रों सुख-दुख कें जेन्है मौन थाहै
तिनका में फाँसी कोय पकड़ै लेँ चाहै।

बीछी-बीछी दावै छी किंछा रों ठोठों,
सोरी-घोंर चिलका चटावै छी नुन।

—‘कुइयाँ में काँटों’ सें

आधुनिक समय में ‘वात्सल्य’ आरो ‘भक्ति’ नाम के दू आरो रस
कें रस के अन्तर्गत मानी लेलों गेलों छै, एकरों उदाहरण प्रस्तुत छै,

वात्सल्य

पूर्ववर्ती आचार्यें वात्सल्य के शृंगार रस के भीतरे मानलें छै, मतर बाद में भोज, विश्वनाथ हेनो आचार्यें वात्सल्य के अलग रस मानतें आरो पुत्र आरनी के आलंबन मानतें हुएँ, बालचेष्टा के ही उद्दीपन मानलें छै, फेनु सिर चूमना, गल्लों लगैवों के अनुभाव रूपों में देखलें छै। एकरों एक उदाहरण नीचें प्रस्तुत छै :

करका, कच्चा माँटी रों बुतरू रँ बुतरू भेलै
भोज-भात के नेतों-पानी द्वारे-द्वार बिल्हैलै
गोबर के पानी में घोरी द्वार-भीत पर लीपै
कोय ऐंगन के मिट्टी के धुरमुस सेँ लै केँ पीटे

छपरी के छौनी होलों छै नया डमोलों लै केँ
लपकी रों मरदाना खुश छै बाप पूत रों भै केँ
करिया-करिया छौड़ी-छौड़ा कादर रों हुलसै छै
देखी केँ लपकी रों मरदाना के दुख झुलसै छै

गीत-नाद के कंठों पर की टन-टन टीन टनक्का
काँसा के थरिया पर बाजै झन-झन-झनक झनक्का
बहुत दिनों के बाद कदरसी अजगुत करै छै खेल
टोला भर रों मौगी के माथा पर देखलौं तेल

देखी-देखी गोद रों बच्चा लपकी हेनो विभोर
आशिष दै छै खनै-खनै मेँ; इस्थिर रहै नै ठोर
मूँ केँ चूमै, गाल केँ चूमै, माथा चूमै लपकी
सुतलों ममता हिरदय के हेनो उठलों छै भभकी

—‘गेना’ सेँ

भक्ति

आचार्य भरत मुनि नें वात्सल्य नाँखी भक्ति रस केँ भी रस में नै गिनलें छै, मतर आचार्य जगन्नाथ नें भक्ति रस के पक्ष में अपनों समर्थन प्रकट करतें हुएँ भगवत्प्रेम केँ ही स्थायी भाव मानलें होलों छै। ई दृष्टि

सैं भजन, तीर्थस्थल आरनी के आलंबन, घंटानाद कें उद्दीपन आरो रोमांच, तल्लीनता, हर्ष आरनी के अनुभाव मानतें होलें दैन्य, रोमांच आरनी कें संचारी भाव मानलें छै। भक्ति रस के एक उदाहरण नीचें प्रस्तुत छै :

“यहें तें सुनै छियै कि पापी सेँ पापी कें तोहें

तारी देलौ ! तरलै जरा-सा नाम लेथैं नी

बालमीकि तरलै तें तरलै अजामिल भी

तरी गेलै गोड़ों सेँ अहिल्या भी छुवैथैं नी

पातकी-पतित कल्लें पापों सेँ विमुक्त भेलै

याद तोरों एक बार हिरदै मेँ ऐथैं नी

यही सब सुनी आबी गेलों छियौं द्वारी पर

कहै छौं—हाथी के सुनलौ सूँढ़ के उठैथैं नी।

—‘गेना’ सें



अलंकार

काव्यशास्त्र के मोताबिक वाणी के विभूषण ही अलंकार छैकै जे या तें सुव्यवस्थित शब्द-विधान सें संभव होय छै या फेनु अर्थ के चमत्कार के कारण; यही सें अलंकार के मुख्य दू भेद मानलौ गेलौ छै :

१. शब्दालंकार

२. अर्थालंकार

आरो जहाँ दोनो के एक साथ अस्तित्व होय छै, वहाँ उभयालंकार के उपस्थिति मानलौ जाय छै।

काव्य में शब्दालंकार के ओतें महत्व नै मानलौ गेलौ छै, जतें अर्थालंकार के, यही लें शब्दालंकार सें कहीं अधिक अर्थालंकार के भेद पैलौ जाय छै।

नीचें शब्दालंकार आरो प्रमुख अर्थालंकार के भेद प्रस्तुत छै।

शब्दालंकार

शब्दालंकार वहाँ होय छै जहाँ अर्थ के सौन्दर्य शब्द-विन्यास पर निर्भर होय छै। ई पाँच प्रकार के मानलौ गेलौ छै।

१. अनुप्रास

२. यमक

३. श्लेष

४. वक्रोक्ति

५. चित्र

अनुप्रास :

अनुप्रास वर्ण या व्यंजन के सजावट कें कहै छै, जे तीन किसिम सें हुए पारें, यही सें अनुप्रास के तीन भेद मानलौ गेलौ छै :

क. छेकानुप्रास

ख. वृत्त्यानुप्रास

ग. लाटानुप्रास

क. छेकानुप्रास : जैठां वर्ण आकि व्यंजन सिनी के एक्के दाफी दुहराव मिलें, वहाँ छेकानुप्रास हुएँ छै। जेना, खंजन रंजन लेली ऐलै!

यैठां 'ज' आरो 'न' के आवृत्ति एक्के दाफी होली छै, यै लेली छेकानुप्रास अलंकार छै।

ख. वृत्त्यानुप्रास : छेकानुप्रास नाँखी वृत्त्यानुप्रास में भी कोय वर्ण कै एक दाफी, आकि कै वर्ण के स्वरूपतः कै दाफीवाला आवृत्ति कै वृत्त्यानुप्रास अलंकार कहली जाय छै। एक गोष्ठी में बोलतें हुए डॉ. अमरेन्द्र नै ई विचार रखलें छेलै कि वृत्त्यानुप्रास कै अलंकार के कोटि में नै राखी कै रीति के अन्तर्गत रखना ठीक होतै, कैन्हें कि यहाँ वृत्ति यानी रस के अनुकूल शब्द-विन्यास रों प्रमुखता होय छै। डॉ. अमरेन्द्र के ई मत में दम छै।

ग. लाटानुप्रास : तात्पर्य केरों भेद सें शब्द आरो अर्थ दोनो के पुनुरुक्ति कै लाटानुप्रास अलंकार कहली जाय छै। ई अलंकार कभियो लाट प्रदेश (गुजरात) में बहुत लोकप्रिय छेलै, यही सें एकरों नाम लाटानुप्रास पड़लै। एक प्रसिद्ध लोकप्रिय उदाहरण नीचें छै :

तीरथ व्रत साधन कहा जो निसिदिन हरि गान

तीरथ व्रत साधन कहा, बिन निसिदिन हरिगान।

यैठां पहिलों चरण के अर्थ छेकै कि जों रात दिन हरि भजन होय छै तें तीरथ-व्रत के जरूरत की छै, वहीं ठां दोसरो चरण के अर्थ छेकै बिना हरिभजन के तीरथव्रत करलाहै सें की फायदा।

यमक:

यमक कोनो स्वतंत्र अलंकार नै होय कै लाटानुप्रास के भीतरे मानली जाय, तें अच्छा। यहा काव्यशास्त्रियो के मत छै।

श्लेष:

श्लिष्ट पद सें अनेक अर्थ के कथन जहाँ होय है, वहा श्लेष अलंकार छेकै।

एक उदाहरण :

एत्ते-एत्ते धन की रखवों
जों घर में एक लाल नै छै।

यहाँ 'लाल' शब्द के दू अर्थ छै : कीमती पत्थर आरो पुत्र। फेनु
दोनो अर्थ यहाँ मान्य छै।

वक्रोक्ति :

जैठां श्लिष्ट पद के कारण कंठ के विशेष ध्वनि के कारण दोसरो अर्थ के
कल्पना करलौ जाय, तें वहाँ वक्रोक्ति हुऐ छै। हिन्दी के एक प्रसिद्ध पंक्ति
के अनुवाद नीचे छै :

एक कबूतर देखी हाथ में पूछै कहाँ अपर छै।

तबें कहलकै, अपर कहाँ ऊ, उड़लै छेलै सपर ऊ।

यहाँ 'अपर' अन्य के जानी-बूझी के दोसरो अर्थ परविहीन लेलौ गेलौ
छै।

अर्थालंकार

उपमा :

कोय वस्तु साथे सादृश्य विधान के उपमा अलंकार कहलौ जाय
छै। उपमा में उपमेय जेकरौ उपमा देलौ जाय। उपमान जेकरा से
उपमा देलौ जाय, सामान्य गुण आकि धर्म या विशेषता आरो सादृश्यवाचक
शब्द होय छै। जहाँ ई चारो होय छै वहाँ पूर्णोपमा होय छै। पूर्णोपमा के
उदाहरण :

चंचल मन जों पीपर पत्ता।

यहाँ मन :- उपमेय; पीपरपत्ता :- उपमान; चंचलता :- गुण आरो
जों :- सादृश्यवाचक शब्द छेकै।

मालोपमा :

जहाँ एक उपमेय लेली कै एक उपमान रहें, वहाँ मालोपमा
अलंकार होय छै। जेना :

जों बसन्त में गाछी के ठारी सें निकलै टूसा

चतुरदशी के बाद सरंग में विहँसै चान समूचा

बितला शैशव पर जों आबै मारलें जोर जुआनी
जेठों के सुखलों चानन में जों भादों के पानी

जिना जुआनी के ऐला पर आबै लाज-शरम छै
लाज-उमिर के ऐथैं युवतीं पाबै पिया परम छै
पिया परम के पैथैं जेना सुध-बुध खोय छै नारी
ढोतें बनै नै केन्हौं ओकरा सुख के बोझों भारी

जेना सौनों में पछिया के उठथैं चलै झकासों
बेली के खिलथैं गंधों रों ठाँव-ठाँव पर बासों
जों समाधि के लगथैं अजगुत सुख कें पाबै तपसी
तपला घरती के बादों में जेना आबै झकसी
आय वहें रँ कादर-पट्टी झूमै झन-झन बाजै
डलिया-सुपती-मौनी-थरिया किसिम-किसिम के साजै
बरस-बरस के बितला पर लपकी बनलों छै माय
सौंसे पट्टी रों मौगी सब गेलों छै उधियाय

—‘गेना’ सें

स्मरण :

स्पष्ट छै कि कोय वस्तु कें देखी पूर्व अनुभूत वस्तु के याद ऐवों
स्मरण अलंकार कहावै छै। जेना :

बड़ी याद आबै छै गेना कें ऊ सब
“इस्कूली के पीछू सेँ निकली कें झबझब
यहीं आबै देखै लें फूलों पर तितली
मतैली रसों सें, ओंधैली रँ तितली
कभी बाँसबिट्टी सेँ तोड़ै बाँसबिट्टों
झड़ाबै पहाड़ी लतामों कें मीट्ठों”
बड़ी याद आबै छै गेना कें ऊ सब
इस्कूली के पीछू सेँ निकली कें झबझब

“ऊ भादों रों दिन मेँ सुखनिया रों बोहों
 मिलै अच्छा-अच्छा केँ जै मेँ नै थाहों
 कुदेँ-धौंस मारै ऊ हेना-मेँ-हेना
 कि डाँड़ी मेँ कूदै कोय बड़का ही जेना
 बहै नाव नाँखी। कभी तौर हेनों;
 मछलिये रँ। उपलै कभी सोँस जेहनों
 हँकाबै, मतुर के सुनै माय केरों
 खड़ा देखै टुक-टुक सब साथी के जेरोँ
 बड़ी याद आवै छै गेना केँ ऊ सब
 ऊ भादों के चानन मेँ पानी रों लबलब

—‘गेना’ सें

भ्रांतिमान :

सादृश्य के कारण प्रस्तुत में अप्रस्तुत के भ्रम भ्रांतिमान अलंकार छैकै।

प्रतीप :

प्रतीप के अर्थ उल्टा यानी विपरीत होय छै। यहाँ उपमेय केँ उपमान आरो उपमान केँ उपमेय रूपों में देखैलों जाय छै।

रूपक :

जैठां उपमेय पर उपमान केरों आरोप होय छै, वहाँ रूपक अलंकार होय छै। यानी उपमेय-उपमान में अभेद के स्थिति देखैवों ही रूपक अलंकार छैकै।

उत्प्रेक्षा :

उपमेय में उत्कृष्ट उपमान केँ देखै के उत्कट इच्छा ही उत्प्रेक्षा अलंकार छैकै। एकरों तीन भेद मानलों गेलों छै। वस्तुत्प्रेक्षा, हेतुत्प्रेक्षा आरो फलोत्प्रेक्षा।

अपह्नुति :

जैठां प्रकृत यानी प्रस्तुत के निषेध करी केँ अप्रस्तुत के स्थापना

करलौं जाय, वहाँ अपस्तुति अलंकार होय छै।

उल्लेख :

कोय वस्तु के विभिन्न किसिम सँ वर्णन ही उल्लेख अलंकार छैकै।

अतिशयोक्ति :

जैठां प्रस्तुत के लोकमर्यादा केँ लौघतेँ बढ़ाय-चढ़ाय केँ वर्णन हुएँ, वहाँ अतिशयोक्ति अलंकार होय छै।

दृष्टान्त :

दृष्टांत दू स्वतंत्र पंक्ति के हेनौं अलंकार छैकै जे स्वतंत्र होला के बादो दोसरौं चरण पूर्व बात के समर्थन में उदाहरण-रूप में आवै छै।

व्यतिरेक :

उपमान के अपेक्षा उपमेय केरौं विशेष उत्कर्ष-वर्णन अतिरेक अलंकार कहावै छै। नीचे उदाहरण छै :

पावक झर तें मेह झर, दाहक दुसह विसेख

दहै देह वाके प रस, याही दृगन ही देख।

वैठां आग के बरसवौं सँ मेघ के बरसवौं में ज्यादा उत्कर्ष है कैन्टेँ कि आग तें छूला पर देह जरै छै मतर मेह केँ देखलै सँ देह जरै लागै छै।

समासोक्ति :

जैठां प्रस्तुत के वर्णन सँ अप्रस्तुत के वर्णन होय जाय, वहाँ समासोक्ति अलंकार होय छै।

व्याजस्तुति :

जैठां स्तुति में निंदा आरो निंदा में स्तुति रहे, वैठां व्याजस्तुति अलंकार होय छै।

विभावना :

कारण के अभावों में कार्य के होना दिखैवो विभावना अलंकार

छेकै ।

स्वभावोक्ति :

जैठां वस्तु के स्वाभाविक वर्णन होय छै, वैठां स्वभावोक्ति अलंकार होय छै ।

मीलित :

रूप-गुण के कारण जैठां दू वस्तु एक्के रं दिखैलौ जाय, वैठां मीलित अलंकार होय छै ।

मिश्रित अलंकार

संसृष्टि :

जहाँ एक्के छंद में कैएक अलंकार मिललौ रहें, वहाँ संसृष्टि अलंकार होय छै ।

संकर :

जैठां कै अलंकार दूध-पानी रं मिललौ रहें, वहाँ संकर अलंकार होय छै ।



छंद-विवेचन

वर्ण आरो मात्रा के सुव्यवस्थित रूप ही छंद छेकै, जेकरा सँ पद्य के निर्माण होय छै आरो पद्य लयात्मक बनै छै।

यैमें ऐलों वर्ण आरो मात्रा पर सबसे पहिले विचारना जरूरी छै। मात्रा दू किसिम के होय छै—ह्रस्व आरो दीर्घ। अ, इ, उ, ऋ ह्रस्व मात्रा छेकै आरो आ, ई, ऊ, ए, ऐ, ओ, औ दीर्घ स्वर।

स्वरे नाँखी व्यंजनो के एकमात्रिक, दूमात्रिक रूप होय छै। कहै के मतलब—जेकरा में ह्रस्व स्वर लगलौ रहें, ऊ एकमात्रिक व्यंजन छेकै, आरो जेकरा में दीर्घ स्वर लगलौ रहें, ऊ द्विमात्रिक व्यंजन छेकै। एक मात्रिक व्यंजन केँ ‘लघु’ आरो द्विमात्रिक व्यंजन केँ ‘गुरु’ कहलौ जाय छै।

मात्रा आरो वर्ण के आधार पर छंद के दू भेद करलौ गेलौ छै—मात्रिक छंद आरो वार्णिक छंद। मात्रिक छंद में मात्रा के प्रधानता होय छै आरो वार्णिक छंद में वर्ण के।

स्वराघात आरो अनुस्वार

स्वराघात रहित अक्षर एकमात्रिक होय छै आरो अनुस्वार युक्त वर्ण के पूर्व एकमात्रिक वर्ण दूमात्रिक होय जाय छै। जेना संयुक्ताक्षर के पूर्व के एकमात्रिक वर्ण द्विमात्रिक होय जाय छै।

लघु के चिन्ह (।) होय छै आरो द्विमात्रिक के (ऽ)

चरण आरो यति

कविता के एक पंक्ति के एक चरण आरो पंक्ति के बीच या अंत में ठहराव के स्थल यति कहावै छै।

अंगिका-छन्द-विवेचन

(१) बयार

मात्रिक जाति के ई चौपदी छन्द में पैहिलौ, दुसरौ आरो चौथौ चरण में मात्रा-भार-कल के समानता मिलै छै यानी कि २०-२० मात्रा

वाला प्रत्येक चरण में मात्रा के रूप आरो कल यै तरह सँ रहै छै—एक चतुष्कल—(।।S या SS), दू पंचकल (।SS - ।SS), एक षट्कल (।S।S)। तेसरों चरण में एक चतुष्कल (SS) आरो एक षट्कल (SSS) के क्रम सँ दू बार आवृत्ति होय छै, यै तरह सँ तेसरों चरण में मात्रा के कुल संख्या २० होय छै । तेसरों चरण में १०-१० मात्रा पर यति पड़ै छै । उदाहरण,

लगनी चिरैया लगन ले लें जाय रे
केला के पत्ता हवा में लहराय रे
बाबा हाँसै छै, चाचा हाँसै छै
बेटी वियाहे में बाप मुरझाय रे'

- रेखांकित अक्षर में मात्रा के भार ह्रस्व रूपों में छै ।
- दुसरों चरण में रेखांकित 'ह' के उच्चारण भारविहीन जकां छै ।

(२) सवासिन

झूमर वर्ग रों ई तिनपदी छन्द आपनों दुसरों आरो तेसरों चरण में मात्रा आरो कल के समानता लेतें २२-२२ मात्रा के चरण वाला होय छै, कल के रूप आरो मात्रा के भार हेना कें होय छै—एक पंचकल (।SS या ।।।S), दू चतुष्कल (SS - SS आकि ।।S - SS - ।।S कोय्यो रूपों में), एक पंचकल (S।S), एक चतुष्कल (।।S) । छंद के पैहिलो चरण में ।।S आकि SS रूपों सँ दू चतुष्कल, दू पंचकल (क्रम—S।S - ।SS) एक चतुष्कल (SS) आरो एक पंचकल (S।S) के कल-क्रम सँ २५ मात्रा होय छै । उदाहरण

बाबा दिलकै हौसुली सहो रे हम्मैं तेजलां
बलेमू केना तेजब हे छोटी ननदी
हमारी जीया डोलै हे छोटी ननदी

सवासिन छंद में पंचकल के जोन रूपों जोन स्थानों में ऐलों छै ओकरों निर्वाह लय वास्तें जरूरी छै । हेना के दोसरों-तेसरों चरण के आखरी चतुष्कल SS के रूपों में हुवें पारै छै मतरकि लय के खयाल सँ ।।S वाला चतुष्कल होना जरूरी छै । यति पैहिलों चरण में १३-२७ आरो दोसरों-तेसरों चरण में १३ आरो २२ मात्रा पर पड़ै छै ।

(३) लयप्रिया

लयप्रिया वास्तव में हुवे चरण के समछन्द छेकै जेकरों प्रत्येक चरण में २६-२६ मात्रा होय छै । मात्रा के कल आरो भार ई तरह सँ होय छै—एक चतुष्कल (।।।। आरो ।।।।), दू पंचकल (।।।। - ।।।।), एक द्विकल (।।), एक सप्तकल (।।।।।।।। आरो एक त्रिकल (।।।।) । यति १६ आरो २२ पर पड़ै छै । उदाहरण

घर सँ निकललै जे अम्मा हे, गले हीरा के हार

धीरे सँ अम्मा चुमइयों हे धिया छै सुकुमार

अंगिका मात्रिक छन्द में संयुक्ताक्षर के पैहिलो अक्षर दीर्घ होय जाय छै । यही सँ अम्मा में दू गुरू छै ।

(४) भगवती

मनौन वर्ग के लोकप्रिय छन्द में प्रमुख—भगवती-दंडक आरो द्विपदी समछन्द छेकै, जेकरों प्रत्येक चरण में ४७-४७ मात्रा होय छै । मात्रा रों भार आरो कल-क्रम नीचें उल्लिखित ढंग सँ होय छै—एक षट्कल (।।।।।।), दू चतुष्कल (।।।।।।।। या ।।।।।।।। रूपों सँ), एक षट्कल (।।।।।।।।) दू चतुष्कल (।।।।।।।। - ।।।।।।।।), एक षट्कल (।।।।।।।।) दू चतुष्कल (।।।।।।।। - ।।।।।।।।) आरो एक पंचकल (।।।।।।।।) । उदाहरण

लाले लाले डोलिया हे चढ़ि अइले कलिका हो मैया

घेरें घेरें करै छै पूछार हे

कौनी जे घर हो छेकै अबला भगतिा के

सेहो हमरा दीयो नी बताय हे

पैहिलों चरण में सब्भे रेखांकित अक्षर ह्रस्व रूपों में छै जबें कि ‘भगतिा’, पद के चारो अक्षर दीर्घ रूपों में ही उचारलों जाय छै । यति १४, २८, ४२ आरो ४७ पर पड़ै छै ।

(५) भैरो

भैरो-कमरथुआ गीत-वर्ग के प्रमुख आरो सर्वाधिक लोकप्रिय छंद छेकै । पंचपदी भैरो छन्द में मात्रा के भार आरो कल यै तरह सँ होय छै—पैहिलों चरण में दू चतुष्कल(।।।।।।।। - ।।।।।।।।), एक त्रिकल (।।।।), चार

चतुष्कल (कोय्यो रूप में) एक पंचकल (ऽ।ऽ) । छंद के दोसरो चरण में छौ चतुष्कल (क्रम—ऽऽ), एक त्रिकल (ऽ।), तेसरो चरण में पाँच चतुष्कल (क्रम—ऽऽ) आरो एक पंचकल (।।ऽ।) चौथो चरण में एक पंचकल (।ऽऽ) एक चतुष्कल (ऽऽ या ।।ऽ), एक त्रिकल (ऽ।), आरो पांचवो चरण में कल आरो मात्रा के भार पैहिले चरण जकां रहै छै ।

जगनथिया हो भाय, दानी के सूरतिया मन में राखियो
कौने मूखे मन्दिर भैया, कौने मुखे किबाड़

कौने मूखे बैठल छथिन दानी सरदार

मैया हो रामेराम

रामे राम हो माय, बाबा के सुरतिया मन में राखियो

- रेखांकित अक्षर लघु रूप में छै ।

(६) अंगमालती

अंगमालती दू चरण वाला विषम मात्रिक वर्ग के छन्द छेकै । एकरों पैहिलो चरण में ३५ मात्रा होय छै जबकि दोसरो चरण में ३० मात्रा होय छै । मात्रा के भार आरो कल पैहिलो चरण में आठ चतुष्कल (क्रम—ऽऽ या ।।ऽ) आरो एक त्रिकल (ऽ।) होय छै जबके दोसरो में एक त्रिकल (ऽ।) छौ चतुष्कल (।।ऽ) आरो एक त्रिकल रहै छै । उदाहरण,

गोरे गोरे बहियां गे लिलया कारे शोभो गोदनमा रे जान
जान गोदना रे देखी मोहना तोरो कुभैकौ रे जान ।

- रेखांकित अक्षर के उच्चारण यहां ह्रस्व रूपों में छै ।

(७) पुरबा

पुरबा दू चरण वाला सममात्रिक जाति के छंद छेकै जेकरों प्रत्येक चरण में २४-२४ मात्र होय छै । प्रत्येक चरण के मात्रा के भार आरो कल हेना के होय छै—एक चतुष्कल (ऽऽ या ।।ऽ), तीन षट्कल (।।ऽऽ), आरो एक गुरु । उदाहरण,

बाबा जुअबा खेलन तोंय कहां रे गेलौ ना

बाबा जुअवे में कथी तोंयें हारी ऐलौ ना

- रेखांकित अक्षर आपनों ह्रस्व रूपों में यहाँ उपस्थित छै ।

(८) अठोङ्गर

चार चरणवाला ई चौपदी छन्द—विषम मात्रिक जाति के छन्द छेकै, जेकरों पैहिलों-तेसरों आरो दुसरों-चौथों चरण में मात्र के भार आरो कल के समानता मिलै छै। पैहिलों-तेसरों चरण में दू चतुष्कल (कोय्यो रूपों में), एक द्विकल (S), तीन चतुष्कल (कोय्यो रूपों में), एक द्विकल (S) के क्रम सँ कुल मात्रा २४-२४ होय छै आरो यति १०-२४ पर पड़ै छै, जबें दोसरों आरो चौथों चरण में सात चतुष्कल (कोय्यो रूपों में) आरो एक द्विकल (S) सँ कुल मात्रा ३०-३० के होय छै आरो यति २०-३० पर पड़ै छै । उदाहरण,

धान कें कूटो हे, दुल्हा धान कें कूटों हे
अपनी बहिनी केरों ओखेंरी में, धान कें कूटों हे
कुटबे करबै हे भौजी कुटबे करबै हे
तोरों बहिनी केरों ओखेंरी में धान के कुटबै हे

● रेखांकित अक्षर पढ़ै गावै के क्रम में ह्रस्व होय जाय छै—जेकरे कारण बहुत जगहा में धान कें बदला में धानक लिखलों मिलै छै ।

विशेष : ऊपर के लोक गीत के टुकड़ा में ‘धान कें’ के जगहा में सिर्फ ‘धान’ मिलै छै तबें वहाँ धान के ‘न’ कें दीर्घ रूपों में उचारै के परम्परा मिलै छै ।

(९) कण्ठा

व्याह के मौका पर मुक्त कंठ सँ गाय जाय वाला के कारने ई कंठा छेकै। मात्रिक जाति के ई द्रुपदी छन्द में मात्रा के भार आरो कल के समानता मिलै छै। कण्ठा के प्रत्येक चरण में सात चतुष्कल (कोय्यो रूप—।।S या SS या S।। या ।।।। रूपों में) साथे आखरी में एक गुरु रूप में एक द्विकल मिलै छै । कुल मिलाय कें प्रत्येक चरण में ३०-३० मात्रा साथे यति प्रत्येक चरण में १६ आरो ३० पर पड़ै छै ।

हम मांगलियै गोरा गोरा करका काहे ऐलै रे
भाग बरतिया साला चोट्टा रुपसा गांव धिनैले रे

(१०) मुक्ति

छठ-गीत-वर्ग में मुक्ति अति लोकप्रिय छन्द छेकै । आपनों दोनो चरणों में समान मात्रा के कारणे ई सममात्रिक द्विपदी छन्द छेकै जेकरों प्रत्येक चरण में तीस-तीस मात्रा होय छै आरो जेकरों भार आरो कल यै तरह सँ मिलै छै—दू षट्कल (।।SS - ।।SS), एक पंचकल (S।S), एक चतुष्कल (।।S) एक षट्कल (।।SS) आरो एक त्रिकल (S।) । यति १४ आरो ३० पर पड़ै छै । उदाहरण

केलेवा जे फरल गहौद से वोई पे सुगा मंडराय
मारेंबौ रे सुगबा धनुख से सुग्गा खेंसै मुरुझाय

● मारबौ में ‘र’ आरो खसै में ‘ख’ के उच्चारण दीर्घ रूपों में मिलै छै ।

(११) पालकी

पालकी चार चरण वाला मात्रिक छन्द छेकै, जेकरों पैहिलों दोसरों आरो चौथों चरण समान भारवाला मात्रा आरो कल के होय छै, यानी ई तीनो चरणों में मात्रा के संख्या २४-२४ होय छै आरो मात्रा के भार-एक चतुष्कल (।।।। या SS), एक पंचकल (।SS), दू चतुष्कल, (।S। - ।S।), एक सप्तकल (S।SS) । यति १३ आरो २४ पर पड़ै छै । छंद के तेसरों चरण में मात्रा के संख्या २१ होय छै आरो कल यै तरह से होय छै—एक चतुष्कल (SS), एक द्विकल (S), एक चतुष्कल (SS), एक द्विकल (S), एक चतुष्कल (कोय्यो रूपों में), एक पंचकल (।SS) । यति १० आरो २१ पर पड़ै छै । उदाहरण,

उबटन के ऐलै बहार, बहार मोरी सखिया

शोभै छै घरवा-दुआर, दुआर मोरी सखिया

सोने के थाली में पीतल हरदिया

गुड़िया छै हमरों तैयार, तैयार मोरी सखिया

● रेखांकित अक्षर आपनों ह्रस्व रूपों में ही ऐलों छै ।

(१२) राम

‘रम्भा’ आकि ‘रामा’ से शुरू होय वाला ई छन्द एकपदी जाति के मात्रिक छन्द छेकै, जेकरा में २४ मात्रा निम्नांकित ढंगों सँ उपस्थित रहै

छै—एक चतुष्कल (SS), तीन षट्कल (11SS, 11SS, 11SS), एक द्विकल (S) । उदाहरण,

रामा बाँधी देलकै ललकी लगनिया रे ना

● रेखांकित अक्षर ह्रस्व रूपों में छै ।

(१३) अयभाती

झूमर लोकगीत वर्ग के नामी छन्दों में अयभाती एक विषम मात्रिक दू पदी छन्द छेकै । एकरों २५ मात्रा वाला पैहलों चरण में कल आरो मात्रा-भार ई ढंग से होय छै—एक चतुष्कल (11S या SS), तीन पंचकल (111S, 111S, 111S), एक षट्कल (S1S) । यति ६, १६, आरो २६ पर होय छै, जबकि दोसरों चरण में कल-मात्रा-भार के व्यवस्था हेना के रहै छै—एक सप्तकल (S1SS या S111S) एक पंचकल (111S - 1SS), एक षट्कल (11SS) । यति १२ आरो १८ पर पड़ै छै । उदाहरण,
लहकै पुरवैया, कि लहकै बदरिया, कि रही-रही
मारै कनखी बिजुरिया, कि रही-रही ।

—डॉ. डोमन साहू ‘समीर’

(१४) वैरागी

विरागी स्वभाव के वैरागी एकपदी मात्रिक छन्द छेकै, जैमें ३१ मात्रा होय छै । मात्रा-भार-कल-व्यवस्था यै तरह से रहै छै—एक षट्कल (11SS), दो चतुष्कल (11S या SS रूपों से), एक पंचकल (111S), एक चतुष्कल (SS), एक पंचकल (S1S), एक त्रिकल (1S) । यति १० आरो ३१ मात्रा पर पड़ै छै । उदाहरण,

उकिया हो रामा, धोबी बकसवा पकड़ें चाहलें रे की ।

● रेखांकित अक्षर ह्रस्व रूपों में छै ।

(१५) मंदार

मंदार विषम मात्रिक द्विपदी छन्द छेकै । ई छन्द के पैहलों चरण में विभिन्न कल आरो मात्रा-भार के क्रम हेना के होय छै—एक षट्कल (S1S1), दू चतुष्कल (SS - SS), एक पंचकल (11S1), एक चतुष्कल (SS), एक द्विकल (S) एक षट्कल (11SS), एक चतुष्कल (11S या

५५)। यति १४ आरो ३५ पर होय छै । ऐकरोँ दुसरोँ चरण में कल के प्रकार आरो मात्रा-भार-क्रम हेना केँ होय छै—एक षट्कल (५।५।) दू चतुष्कल (।।५ या ५५), एक द्विकल (५), एक षट्कल (।।५५) एक चतुष्कल (५५ या ।।५)

साग पात खोटी-खोटी, दिनमा गमैवै हे मिथिलै में रहबै
आबेँ दुख सहलौ नै जाए, मिथिलै में रहबै ।

● पैहिलौ चरण में एक षट्कल के बाद चतुष्कल के क्रम ५५ के जग्घा में ।।५ भी हुवें पारै छै ।

● रेखांकित अक्षर ह्रस्व रूपों में छै ।

(१६) वसन्त

होली गीत वर्ग के नामी छन्दों में वसन्त के स्थान अति लोकप्रिय छै । चार चरण वाला ई चतुष्पदी छन्द में मात्रा के संख्यौ अलग-अलग हुवै छै । एकरों पैहिलौ चरण में मात्रा-भार-क्रम आरो कल हेना केँ होय छै—एक चतुष्कल (५५), एक द्विकल (५), एक चतुष्कल (५५), एक द्विकल (५), दू पंचकल (क्रम—।।५। - ।५५), एक चतुष्कल (५५), एक द्विकल (५) । छन्द के दुसरोँ चरण में कल आरो मात्रा-भार के क्रम यै तरह सँ होय छै—एक अष्टकल (कोय रूपों में), एक त्रिकल (५।), एक पंचकल (।५५), एक अष्टकल (कोय रूपों में), एक चतुष्कल (।।५ या ५५) । एकरों तेसरोँ चरण में कल आरो मात्रा के भार हेना केँ होय छै—एक अष्टकल (सामान्यतः एक षट्कल, एक द्विकल के योग सँ) एक त्रिकल (५।), एक पंचकल (।५५), दू चतुष्कल (।।।। या ।।५ या ५५ रूपों सँ) आरो एक त्रिकल (५।) । चौथोँ चरण में एक पंचकल (।५५) आरो एक षट्कल (५५५) होय छै ।

फूलों सँ फलों सँ, हे देवी भवानी फूलों सँ
दखिन-दिशा नै जैयो बलुमआ दखिन दिशा बड़ भारी
बाघ-सीघ तोरा खय जैथौं हम धनि रहबौं दुखारी
भवानी फूलों सँ

● रेखांकित अक्षर ह्रस्व रूपों में छै । यति पैहिलौ चरण में छौं मात्रा (एक चतुष्कल, एक द्विकल) के बाद पड़ै छै ।

(१७) कष्टहरणी

मात्रिक जाति के कष्टहरणी दू पदी छन्द छेकै, जेकरों पैहिलों चरण में मात्रा के संख्या ४२ होय छै । मात्र के भार-क्रम एकरों पहलों चरण में निम्नांकित 'कल' में विभाजित रहै छै—एक सप्तकल (ऽ।ऽऽ या ऽ।ऽ।।), एक पंचकल (ऽ।ऽ), एक अष्टकल (।ऽ।ऽ।।), एक चतुष्कल (ऽऽ या ।।।।), एक सप्तकल (ऽ।ऽ।।), एक चतुष्कल (ऽऽ या ।।।।), (एक सप्तकल (ऽ।ऽ।।) ।

छन्द के दोसरों चरण में छों चतुष्कल (कोय्यो रूपों में), एक पंचकल (ऽ।ऽ) सार्थें २६ मात्रा होय छै । यति पैहलों चरण में २०, ३१, आरो ४२ पर पड़ै छै, जबैकि दोसरा चरण में १२ आरो २६ पर पड़ै छै । उदाहरण,

सब्बे माय के हाथ में गुलाब के छड़ी, चम्पा फूल के
छड़ी

अड़हुल फूल के छड़ी

भैया दीहौ नी आशिषबा घरबा जाऊँगी चली

(१८) पियावासा

सम मात्रिक जाति के दूपदी छन्द-पियावासा रों प्रत्येक चरण में कुल २६-२६ मात्रा होय छै । एक चरण में मात्रा के भार के क्रम—एक चतुष्कल (।।ऽ या ऽऽ), एक पंचकल (।ऽऽ), एक चतुष्कल (।ऽ।), तीन पंचकल (।ऽ - ।ऽ - ।ऽ) रहै छै । यति प्रत्येक चरण में १३ आरो २८ पर पड़ै छै । उदाहरण,

साली सरोजों के पास, गभरुआ कें जावें नै देवै

सात समुन्दरों के पार गभरुआ कें जावें नै देवै

● रेखांकित अक्षर आपनों ह्रस्व रूपों में छै ।

● उदाहरण में (संस्कृत छन्द-विवेचन के अनुसार) 'समन्दरों' में 'न्द' संयुक्ताक्षर ही गुरू छै, जबै कि प्राकृत के अनुसार संयुक्ताक्षर के पूर्व अक्षर 'म' गुरू होतै ।

(१६) कोशी

कोशी मात्रिक जाति में दंडक वर्ग के एकपदी छन्द छेकै, जेकरा में कुल मात्रा ४८ रहै छै । मात्रा के भार-क्रम आरो कल यै तरह सँ होय छै—दू पंचकल (ISS - ISS), चार चतुष्कल (क्रम—SS - IIS - IIS - IIS), दू पंचकल (ISS - ISS), दू चतुष्कल (क्रम—IIS या SS), एक पंचकल (SIS), दू चतुष्कल (IIS-IIS), एक पंचकल (SIS), एक त्रिकल (IS) ।

यति-विधान के कारणें ई द्विपदी छन्दो मानलौ जावें सकें छै । तबें कल हेना केँ होतै—पैहिलौ चरण में—दू पंचकल, चार चतुष्कल, दोसरौ चरण में दू पंचकल, एक चतुष्कल, एक पंचकल, एक त्रिकल । स्मरण राखना चाहियौ कि द्विपदी होल्हौ पर मात्रा के भार आरो कल के क्रम में कोय अन्तर नै ऐतै । उदाहरण,

पहुँची गईलै जाके जमुना गढ़ नगरिया हो

जोगी के सुरतिया जमुनी देखे लें रे की

● यहाँ रेखांकित अक्षर सिनी में 'हुँ' गुरू रूप में आरो 'ना' 'खै' 'रे' लघु रूप में ऐलौ छै ।

(२०) गंगा

गंगा विषम मात्रिक जाति के द्विपदी छन्द छेकै, जेकरौ पैहिलौ चरण में एक षटकल (SISI), सात चतुष्कल (क्रम—SS - SS - IISI - IISI - SS - SS - IIS - IIS), एक त्रिकल (SI) ।

जबेकि दोसरौ दुसरौ चरण में मात्रा के भार आरो कल के क्रम यै तरह सँ होय छै—एक पंचकल (SIS), तीन षटकल (क्रम—SIS, SIS, SIS), दू चतुष्कल (क्रम—IIS - IIS), एक त्रिकल (SI) । उदाहरण,

आस-बाट देखी-दाखी डगमग डोलै आबें डोलै मन मस्तूल

सैया बिनु जग अजवारी लागै देवा हो रही, रही मारै छै हूल ।

(२१) शीतलामृत

शीतलामृत-अंगिका के मनौन वर्ग के गीतों के लोकप्रिय छन्द

छेकै । विषम मात्रिक वर्ग के ई छन्दों के दुन्हू चरणों में मात्रासिनी क्रमशः १८ आरो १४ होय छै । एकरों पैहिलों चरण में कल आरो मात्रा के भार यै तरह सँ होय छै—तीन चतुष्कल (क्रम—।।५, ।।५, ।।५) आरो एक षट्कल (क्रम—।।५५), जबें कि दोसरों चरण में दू चतुष्कल (।।५ -।।५) आरो एक षट्कल (।।५५) होय छै । उदाहरण,

गलियाँ-गलियाँ घूमै छै शीतल मैय्यो
कोय नै जागै छै आधी रतिया हे

- रेखांकित अक्षर के उच्चारण ह्रस्व रूपों में ऐलों छै ।

(२२) अंगधात्री

मनौन वर्ग के गीत के अति लोकप्रिय छन्द में अंगधात्री प्रमुख छै । अंग जनपद के कुल देवी 'अंगधात्री' के उपासना में गावै जाय वाला ई छन्दों में दू चरण होय छै आरो दोनों चरणों में मात्रासाभार आरो कल के समानता होला के कारण ई समपदी छन्द छेकै । एक चरण में कल के क्रम हेना कें होय छै—एक षट्कल (।।५५), चार चतुष्कल (क्रम—।।५, ।।।।, ।।५, ५५) आरो एक त्रिकल (५।) । उदाहरण,

कथी केरों अँग ही रे कँगही कथी केरों हे काम
मचिया बैठली अंगधात्रि माय झाड़ै लाम्मी रे केश

- रेखांकित अक्षर ह्रस्व रूपों में ऐलों छै ।
- 'अ' 'क' में ' ' ' के गिनती नै छै ।

विशेष : प्राकृत छन्द में दू लघु मिली कें जगह-जगह पर एक गुरु के रूप भी लै लै छै, जेना कि कै जग्घा पर गुरु रूपों में एक अक्षर होला के बादो ऊ आपनों स्वरूप में ऊ दू लघु जकां ही रहै छै ।

कुछ लोकप्रिय हिन्दी छंद

(१) युग

ई एक चतुष्कल यानी चार मात्रा के मात्रिक छंद छेकै जे चार लघु या दू गुरु, या फेनु एक गुरु दू लघु के हुए पारे । जेना :

कारों
उज्रों
ऐलै
बदरा ।

—स्वरचित

(२) अखंड

ई दू युग (यानी दू चतुष्कल) के योग छेकै। आठ मात्रा के ई छंद दू चतुराकल के योग से बनै छै। उदाहरण लेली :

कारों-उज्रों
ऐलै बदरा

—स्वरचित

(३) शशिवदन

‘छंदोदर्पण’ में डॉ. गौरी शंकर मिश्र नें एकरा शशिवदना लिखलें छै। अखंड में दू मात्रा के बढ़ाय देला से शशिवदन छंद के निर्माण होय जाय छै; जेना :

खाली-खाली छै
खाक, दिवाली छै।

—स्वरचित

(४) अहीर

ग्यारह मात्रिक छंद यानी तीन चतुष्कल के अखिरलका गुरु के लघु करी देला से अहीर छंद बनी जाय छै। उदाहरण स्वरूप :

कौनी घर में आग
पानी कन्ने जाय
कुछ करतै तें मेघ,
की करतै ई छाय।

—स्वरचित

(५) महानुभाव

महानुभाव तीन चतुष्कल के मात्रिक छंद होय छै, जेकरों आखिर में दू गुरु, दू लघु या दू लघु-एक गुरु हुए पारें; जना :

ठारी में छै मंजर

खूब टिकोला फरतै
गमगम करतै आमो
कुछ होने ही गामो ।

—स्वरचित

(६) हाकलि

हाकलि चौदह मात्रा के मात्रिक छंद होय छै । चौपाई छंद के अंतिम दू मात्रा के घटाय देला सँ ई छंद बनी जाय छै । जेना :

सतुआनी के परब निकट
आबैवाला जेठ विकट
अखनी सँ जी हड़हड़, हड़
ताड़-डमोलों खड़-खड़, खड़ ।

—स्वरचित

(७) चौपई

चौपाई के अंतिम गुरु के लघु करी देला सँ चौपई मात्रिक छंद बनी जाय छै । उदाहरण :

बहुत दिनों पर ऐलियै गाँव
तड़तड़िया रौदी में छाँव

—स्वरचित

(८) चौपाई

चौपाई चार चतुष्कल के योग सँ बनै छै । अंत में एक गुरु या दू लघु होय छै । उदाहरण :

तोरो रूप; सुधा ज्यों बरसे ।

मरुवैलों जतना जे जग में
वै में प्राण अचोके आवै,
दुबड़ी रं जरलों रोआं पर
ओसों सँ क्षण-क्षण नहलावै;
मन में गूँजै भौर प्रेम के
खिलै हृदय के कमल हठासी

टटका-टटका भाव लगै सब
 एक जरा नै कुछुवो वासी।
 हेनों भावों-अनुभव लेली
 हमरो जीवन युग-युग तरसें ।

—चन्द्रप्रकाश 'जगप्रिय'

(६) दोहा

दोहा चौबीस मात्रा के छंद होय छै, जेकरों विषम (पहिलों आरो तेसरों)
 चरण में तेरह-तेरह आरो सम चरण (दोसरों-चौथों) में ग्यारों-ग्यारों
 मात्रा होय छै। तुक सम चरणों में होय छै आरो जेकरों अंत गुरु-लघु सें
 होय छै। जेना :

सबके सहयोगों बिना होथौं नै काम,
 बिना कुछ काम करले होथौं नै नाम।

—ई. नंदलाल यादव 'सारस्वत'

(१०) सोरठा

सोरठा छंद में भी चौबीस मात्रा होय छै, मतर एकरों विषम (दोसरों-चौथों)
 चरणों में ग्यारों-ग्यारों मात्रा आरो सम (पहिलों-तेसरों) चरण में
 तेरह-तेरह मात्रा होय छै। जेना :

पुरबा बहै वतास, उमड़ै-घुमड़ै मेघ छै
 बुझतै धरती-प्यास, सब जानै ई भेद छै।

—ई. नंदलाल यादव 'सारस्वत'

(११) रोला

ई भी मात्रिक वर्ग के ही छंद छेकै, जेकरा में चौबीस मात्रा होय छै।
 एकरों विषम चरण में ग्यारों-ग्यारों आरो सम चरणों में तेरह-तेरह मात्रा
 पर यति होय छै। उदाहरण :

आरो कुछ दिन बाँझ, फुलैतै फेनू धरती
 हँसतै खूब ठढाय, अधैतै परपट परती।

—ई. नंदलाल यादव 'सारस्वत'

(१२) कुण्डलिया

कुण्डलिया दोहा आरो रोला छंद के योग सें बनै छै। यै में एक दोहा के
 बाद दू रोला रखलौं जाय छै। यथा :

दल के बिन तैं जानले-प्रजातंत्र ही शेष
 दलगत में पड़लौं फिरै-हमरों भारत देश
 हमरों भारत देश, कहै छौं बात ई सच-सच
 शासन रों कीचड़ में दल रों पिल्लू खच-खच
 होतै आरो देश जहाँ पर होतै दू दल
 अमरेन्दर अपनों देशों में दल रों दलदल।

—‘कुइयाँ में काँटों’ सें

(१३) भुजंगप्रयात

ई छंद चार यगण के योग से बनै छै। यगण यानी।ऽऽ

उदाहरण :

कहाँ छौं, कहाँ छौं, अनाथो के मालिक
 बड़ा ही कठिन छै ई जिनगी के ढोवों।

—स्वरचित

(१४) हरिगीतिका छंद

यह छंद चार सप्तकल के ई क्रम से रखला से बनै छै।ऽऽऽऽ,ऽऽऽऽ,
 ऽऽऽऽ,ऽऽऽऽ

अजगुत दिरिश सब लोग देखै आय की ई रही-रही
 झूमै लता-फल-फूल-कोढ़ी बांही सब रों गही-गही
 एक असकललों विरिछ पर अरबों फुललौ छै फूल-फल
 मकरन्द सनलो भौरा लागै, सूर्य। खिललों, नभ, कमल

—‘गेना’ सें

(१५) कवित्त

कवित्त वार्णिक छंद छेकै, जेकरा में वर्ण के प्रधानता होय छै। एकरों के
 प्रकार होय छै। कवित्त भी एक भेद छेकै, जेकरों उदाहरण नीचें छै :

धोलों-धोलों रात लागै, दिन भी नहैलौं हेनौं
 साफ-साफ सरंगो भी कांचे रँ सुहाबै छै
 गरदा के नाम नै कहीं पे जरियो टा भी छै
 चुनी-चुनी बीछी लेलें रेंहें हेने लागै छै

रेशमी पटोरी रँ माँटी, मौन होने मोहै
 मनोँ सेँ विराग-जप-जोग केँ भगावै छै
 धोबी सेँ धुलैलौ दगदग धोती हेनोँ दिन
 जोगियो रौ निरमल मनोँ केँ लजाबै छै ।
 —‘गेना’ सेँ

(१६) मतगयंद सवैया

सात भगण के क्रम सेँ रखला पर मतगयंद सवैया के निर्माण होय छै ।

जना :

की कहियौं सब बात खुली, मन में रखवे सब ठीक लगै
 जे कुछुवो बुझना जिकरा बुझते नि रहौ चुपचाप छियै ।
 पागल पागल पागल होय कहाँ तक जाँव? नै जोग दिखै
 ई जिनगी दुख सेँ बनलौ कसला—जिकरा विधि वाम लिखै ।

—स्वरचित



नाटक

काव्य में नाटक सर्वाधिक रम्य काव्य कहलौं गेलौं छै, जैमें अभिनय के प्रधानता होय छै। अभिनय में केकरो रूप धरी कें ओकरो क्रिया-कलाप के अनुकरण होय छै। केकरो रूप धारण करला के कारणे नाटक कें रूपक कहलौं जाय छै। ओना कें एकरौं एक नाम दृश्य काव्य भी छेकै।

नाटक में नट (अभिनय कर्ता) के प्रधानता होय छै। यही सें नायक पर विशेष विचार भारतीय नाट्यशास्त्र में करलौं गेलौं छै। एक बात आरो कि नाटक में अनुकरण खाली क्रिया-कलाप के ही नै होय छै, भाव के भी होय छै, यैसैं नाटक विवेचन के क्रम में अभिनय के रूप-भेद पर भी कम विचार नै करलौं गेलौं छै।

नाटक रौं अंग

भारतीय काव्यशास्त्र में नाटक के तीन अंग ही प्रमुख मानलौं गेलौं छै—१. कथावस्तु, २. नायक, ३. रस

जबेकि पाश्चात्य कव्यशास्त्र में १. वस्तु (कथावस्तु), २. पात्र, ३. कथोपकथन, ४. देशकाल, ५. शैली आरो ६. उद्देश्य पर बल देलौं गेलौं छै।

एक बात यैठां बताय देना जरूरी होतै कि भारतीय आचार्य के बतैलौं तीन तत्व में कथोपकथन, देशकाल आरनी समैलौं होय छै। होना कें सहूलियत लेली पाँच तत्व कें सामना रखी कें ही नाटक के अंग पर विचारना ठीक होतै।

वस्तु

वस्तु के संबंध में लगभग सब विद्वान एकमत छै कि कथावस्तु प्रख्यात हुए पारें, उत्पाद्य हुए पारें आरो फेनु मिश्र भी हुए पारें।

प्रख्यात कथावस्तु के मतलब छेकै कि ऊ वस्तु कोय ऐतिहासिक या पौराणिक ग्रंथ पर आधारित छै, जबकि उत्पाद्य के अर्थ छेकै कि ऊ लेखक के कल्पना के उपज छेकै। मिश्र कथावस्तु में दोनो प्रकार के वस्तु

शामिल होय छै।

वस्तु चाहें कोइयों किसिम के रहें, ओकरा में संभाव्यता, विश्वसनीयता के होना सबसँ अधिक जरूरी छै

कथावस्तु के संबंध में यहू बात जानी लेना जरूरी छै कि वस्तु के दू भेद आरो होय छै -

(क) आधिकारिक

(ख) प्रासंगिक

नाटक में मुख्य कथावस्तु ही आधिकारिक कथावस्तु छेकै आरो बीच-बीच में ऐतें रहें वस्तु-प्रासंगिक। प्रासंगिक कथा भी दू किसिम के होय छै

१. पताका

२. प्रकरी

पताका कथावस्तु प्रकरी से कुछ अधिक देर ठहरै वाला कथावस्तु छेकै।

दृश्यात्मकता के आधारों पर वस्तु के दू भेद करलौ गेलौ छै :

(क) दृश्य

(ख) सूच्य

रंगमंच पर सब दृश्य कें देखैलौ नै जावें पारें, यै लेली ऊ दृश्य के खाली नेपथ्य सँ सूचना दै देलौ जाय छै।

अवस्था, प्रकृति आरो संधि

अवस्था : वस्तु के अवस्था सँ मतलब नाटक में कार्य व्यापार के स्पष्टीकरण सँ छै। ई अवस्था पाँच मानलौ गेलौ छै :

१. प्रारंभ

२. यत्न

३. प्राप्त्याशा

४. नियताप्ति

५. फलागम

प्रारंभ कथारंभ के सूचना अवस्था छेकै, जबकि दूसरों अवस्था इच्छित फल प्राप्ति लेली यत्न दिस संकेत करै छै। तें तेसरों अवस्था में इच्छित फल प्राप्ति के संभावना प्रकट होय छै, जबकि चौथों अवस्था में

इच्छित फल प्राप्ति के मात्र आशा भर रहै छै। पाँचवों अवस्था में फल रों प्राप्ति होय जाय छै।

अर्थ प्रकृति : कार्यसिद्धि के कारण आकि साधन कें ही अर्थप्रकृति कहलौ जाय छै, जे पाँच किसिम के बतैलौ गेलौ छै :

१. बीज
२. बिन्दु
३. पताका
४. प्रकरी
५. कार्य

यै ठां ई बताय देना जरूरी होतै कि कथावस्तु के अवस्था और अर्थप्रकृति में कोय बड़ों भेद नै के बराबर देखैलौ जावें सकै छै। बीज में कारण के बीज भर रहै छै तें बिन्दु में कुछ विस्तार होय छै। पताका-प्रकरी में कथावस्तु संकट कें पार करी फल के दिशा में बढ़ी जाय छै।

संधि : अवस्था, अर्थप्रकृति नाँखी संधि के भी पाँच अवस्था बतैलौ गेलौ छै।

संधि के संबंध में यही कहलौ जैतै कि अवस्था आरो अर्थप्रकृति में जबें ठीक-ठीक संयोग होय जाय छै, जे कथावस्तु के रोचकता के कारणो छेकै, तें ओकरे साहित्यशास्त्र में संधि कहलौ गेलौ छै। ई पाँच संधि निम्नांकित छेकै :

१. मुख
२. प्रतिमुख
३. गर्भ
४. विमर्श
५. निर्वहण

पात्र

नाटक में कथानक कत्तो श्रेष्ठ रहें, नाटक के सफलता के पात्र के चित्रण आरो अभिनय पर ही निर्भर करै छै, यही लेली नाटक में जो कथावस्तु

सैं बेसी महत्व पात्र कें देलें गेलों छै, तें ऊ एकदम सही छै। पात्र कत्तें महत्वपूर्ण होय छै, ई बात तें हम्मैं एकरो सैं समझें पारैं कि पात्र लेली आचार्य नैं ओकरा में तैइस गुणों के होना जरूरी बतैलें छै। ई गुण छेकै : विनीत, मधुर, त्यागी, दक्ष, प्रियंवद, लोकप्रिय, निर्मल, वक्ता, उच्च वंशी, धैर्यवान, युवा, बुद्धिमान, उत्साही, स्मृति संपन्न, प्रज्ञावान, कलावन, स्वाभिमानी, शूर, दृढ़, तेजस्वी, शास्त्रज्ञ आरो धार्मिक

यहाँ यहू बताय देना जरूरी छै कि भारतीय आचार्य द्वारा गिनैलों नायक के ई गुण कें वही संदर्भ में देखलें जाना चाहियें जे आचार्य के मनो में छेलै। हमरा भूलना नै चाही कि नाटक कें पंचम वेद मानलें गेलों छै--जेकरों नायक तबें सामान्य केना हुए पारें।

नायक रों भेद :

गुण के आधार पर नायक रों चार भेद करलें गेलों छै :

१. धीरोदात्त
२. धीरललित
३. धीरप्रशांत
४. धीरोद्धत

समस्त मानवीय गुणों सैं संपन्न नायक धीरोदात्त होय छै। धीरललित ऊ छेकै, जे स्वभाव सैं प्रेमी आरो मृदु स्वभाव के हुए। धीरप्रशांत नायक में सब्भे गुण तें होवे करै छै, मतर हेनो नायक में हर हाल में गांभीर्य प्रमुखता सैं पैलें जाय छै। जबेंकि धीरोद्धत नायक ई तीनो नायक के उल्टा होय छै -- एकदम निरंकुश, एकदम उदंड।

यहाँ यहू बताय देना जरूरी छै कि शृंगार रस के संदर्भ में ई चारो नायकों के चार भार भेद करलें गेलों छै :

१. दक्षिण
२. अनुकूल
३. शठ
४. धृष्ट

दक्षिण नामक ऊ छेकै जे अपनों सब्भे प्रिया साथें एक समान

राग रखै छै। एक्के पत्नी सँ राग रखै वाला अनुकूल कहावै छै। शठ नामक ऊ छेकै जे अनेक स्त्री सँ आपनो प्रेम केँ अपनी पत्नी सँ छिपावै छै। धृष्ट नायक ऊ छेकै, जे अपनी पत्नी के बिल्कुल खयाल नै करें।

फेनु यहू सब के तीन-तीन भेद भारतीय काव्यशास्त्री मानलें छै :

१. उत्तम,
२. मध्यम
३. अधम।

नायिका

नायक नाँखी नायिकाओ के भेद काव्यशास्त्र में खूब होलें छै। वय (३ मिर) के अनुसार नायिका के तीन भेद मिलै छै :

१. मुग्धा
२. मध्या
३. प्रौढ़ा

सामान्यतया नायिका के तीनों भेद मिलै छै :

१. स्वकीया
२. परकीया
३. सामान्या

होना केँ शारीरिक सौन्दर्य के आधार पर भी नायिका के ई भेद मिलै छै :

१. पद्मिनी
२. शंखनी
३. हस्तिनी
४. चित्रणी।

अभिनय

नय में अभि उपसर्ग लगैला सँ अभिनय शब्द बनै छै। अभि के मतलब होय छै ठीक ठीक, आरो नय के मतलब छेकै प्रकट करना। तें जे क्रिया सँ भाव के ठीक-ठीक प्रकटीकरण हुएँ पारें, वही अभिनय कहावै छै।

अभिनय चार प्रकार के मानलौं गेलौं छै :

१. आंगिक
२. वाचिक
३. आहार्य
४. सात्विक।

आंगिक अभिनय में अंग संचालन के प्रमुखता रहै छै, जबैकि वाचिक में वाणी करौं।

होन्है के आहार्य में वस्त्र-आभूषण आरनी के प्रमुखता होय है, जबै कि सात्विक अभिनय रौ संबंध मन के भाव प्रकट करना सँ छै, जे घाम, कंप आरनी सँ प्रकट होय छै।

रूपक रौ भेद

संस्कृत काव्यशास्त्र रौ मुताबिक रूपक दस प्रकार के होय छै, जे निम्नांकित छै :

(१) नाटक : नाटक नाट्य लक्षण सँ परिपूर्ण रूपक होय छै; नै खाली संधि-पात्र के दृष्टि सँ, बलुक अभिनय आरो रस के दृष्टि सँ भी।

(२) प्रकरण : एकरौ कथा कल्पित होय छै। एकरौ नायक धीर प्रशांत क्षत्रिय, ब्राह्मण आकि वणिक हुएँ पारें।

(३) भाण : एक अंक के ई रूपक में धूर्त कथा के प्रधानता होय छै।

(४) प्रहसन : यहू एक अंक के ही रूपक होय छै, जैमें हास्य रस के प्रधानता होय छै। धर्म के नाम पर ढोंगी पात्र के प्रधानता।

(५) डिक : हेनौ रूपक में मानवेतर पात्र के प्रमुखता होय छै आरो ई चार अंक के होय छै।

(६) व्यायोग : एक अंक के ई रूपक में कोय इतिहास प्रसिद्ध पात्र के युद्ध के कथा होय छै। युद्ध भूमि आकि स्त्री वास्तें हुएँ पारें।

(७) समयकार : तीन अंकों के ई रूपक के पात्र देव आकि दानव हुएँ पारें।

(८) वीथी : शृंगार रस के ई रूपक एक अंक के होय छै। एकरौ पात्र भाण सँ मिलतें-जुलतें होय छै।

(९) अंक : एक सँ लैके तीन अंकों के ई रूपक में करुणा रस के

प्रधानता होय छै।

(१०) ईहामृग : ईहामृग में अंक रों संख्या चार होय छै आरो कथावस्तु मिश्रित। खास बात यहाँ ई होय छै कि हेनों रूपक में कोय असाधारण नारी के अपहरण के कथा होय छै।

रूपक के ई दस भेद के अतिरिक्त कथावस्तु के आधार पर दू भेद करलौ गेलौ छै :

(क) दुखान्त

(ख) सुखांत



पाश्चात्य काव्यशास्त्र

—डॉ. आभा पूर्वे

जे किसिम से आत्मा से मुक्तावस्था ज्ञान दशा कहाय है, वही रँ हृदय से मुक्तावस्था रसदशा कहाय है।

—आचार्य रामचंद्र शुक्ल
पीड़ा के क्षणों के प्रकट करैवाला गीते मधुरतक होय है।

—शैली

प्लेटो रों काव्य सिद्धांत

जेना भारत में आचार्य भरत से काव्यशास्त्र-विवेचन रों आरंभ मानलें जाय छै, होनै के यूनान में काव्यसंबंधी विवेचन रों जनक प्लेटो के ही मानलें जाय छै। पाश्चात्य काव्य शास्त्री अरस्तू हिनके शिष्य छेलै। सच तें यही छेकै कि अरस्तू के साहित्य में जोन अनुकरण आरो विवेचन के बात ऐलें छै, ओकरो दर्शन प्लेटो के काव्य-चिंतन में ही मिली जाय छै।

ई केकरौ जानी के आचरज हुए पारें कि प्लेटो कविता के या काव्य प्रतिभा के ईश्वरप्रदत्त मानथौं, कवि के एक आदर्श राज्य के लायक नै मानै छेलै। यहाँ तांय कि हुनको ई मत छेलै कि एक आदर्श राज्य में कवि के कोय जरूरत नै छै।

आबे हुनको जों हेनो मत छेलै तें एकरों पीछू के कारणो के जानना जरूरी छै।

दरअसल एक आदर्श राज्य में प्लेटो हेनो कवि आरो कविता के पक्ष में नै छेलै, जे लोगो में उदात्त भाव जगाय के बदला खाली सतही मनोरंजन लेली सामान्य मनोभाव के जगावें, ओकरो पोषण करें।

आरो अपनो समय के काव्य के अध्ययन करता के बाद प्लेटो अधिकांश काव्य में यहा पैलें छेलै कि कवि हेनो सब भाव आकि विचित्रता के अपनो काव्य में उतारी रहलें छै, जेकरा से स्वस्थ समाज के निर्माण नै हुए पारें, यही से प्लेटो नें एक आदर्श राज्य से कवि के बहिष्कार तक के बात उठाय देलें छेलै।

एकरो पीछू एक यही कारण नै छेलै, एक कारण तें यहू छेलै कि प्लेटो विचारवादी दार्शनिक रहै। हुनको लें विचार ईश्वर छेलै आरो ई सृष्टि वहा विचार के अनुकृति भर छेकै। आरो एक कवि या कलाकार यहा अनुकृति के रूप अपनो कविता में उतारै छै, यै किसिम से कविता सत्य से बहुत दूर होय जाय छै। हेनो स्थिति में जे काव्य सत्य से बहुत दूर छै, ऊ अनुकृति के भी अनुकृति छेकै, तें हेनो चीजों के आदर्श राज्य में की जरूरत? हिनी त्रासदी के भी विरोध करलें छै, यहा कारणे कि यैमें जे दुःख, अवांछनीय दृश्य के अनुकरण करलें जाय छै, ओकरो

दर्शक पर बुरा असर नै पड़तै, ई बातों के दावा केन्हौ कें नै करलौ जावें सकें !

जों ई कहलौ जाय छै कि प्लेटो कवि के मन-मिजाज जरूर राखै छेलै, मतर हुनी काव्यशास्त्री ही छेलै, ई कहना एकदम सही-सही नै होतै। हुनी कोय व्यवस्थित ढंग सें काव्य पर विचार प्रकट नै करी, अपनों किताब में यहाँ-वहाँ काव्यमत प्रकट करलें छै—वहू एक आदर्श राज्य के संदर्भ में। एक आलोचक नें ठीक ही लिखलें छै कि प्लेटो के काव्यमत रों मूल्यांकन तत्कालीन यूनान के राजनीतिक, सामाजिक परिस्थिति के परिप्रेक्ष्य में ही होना चाही, कि हुनी काव्य आरो कवि रों एत्तें विरोधी केन्हें दिखै छै।

अरस्तू रों अनुकरण सिद्धांत

पाश्चात्य काव्यशास्त्र में आपनों अनुकरण सिद्धांत लेली विख्यात अरस्तू प्रख्यात काव्यशास्त्री प्लेटो रों शिष्य छेलै—जे दार्शनिक प्लेटो नें काव्य सें संबंधित काव्य-प्रेरणा, त्रासदी, अनुकरण, काव्य रों उद्देश्य आरनी विषय पर भी विचार करलें छेलै—यही कारण छै कि जबें अरस्तू नें काव्य सें संबंधित विषय पर विचारना शुरू करलकै, तें हुनकों सामना में काव्य-संबंधी धारणा पहलें सें मौजूद छेलै, मतर अरस्तू के महत्व यै लेली बहुत अधिक छै कि हिनी काव्य के विषय पर विचार ऊ समय के प्रमुख काव्य कें सामना रखी कें ही करलें छै, यै लेली हिनकों काव्य-संबंधी विचार अपनों गुरु के काव्य-संबंधी मत सें अधिक विश्वसनीय आरो प्रभावित करैवाला छै, होना कें यहू बातों सें इनकार नै करलौ जावें सकै छै कि अरस्तू के विचार सांकेतिक होला के कारण अस्पष्ट भी छै, जेकरा पर बाद के विद्वानों नें अपनों-अपनों समझ सें विचार करने छै। अरस्तू नें काव्य के जे-जे पक्ष पर विचार करने छै, वैमें अनुकरण के सिद्धांत प्रमुख छै।

आलोचक डॉ. तारकनाथ बाली नें अरस्तू के अनुकरण सिद्धांत पर विचार करतें लिखलें छै कि आखिर हिनकों काव्य-विवेचन में अनुकरण कें एत्तें प्रमुखता केन्हें प्राप्त छै, तें एकरों चार कारणो बतैने

छै :

पहलों तें यही कि अरस्तू कें ई शब्द काव्यशास्त्री प्लेटो सें प्राप्त होलें छेलै।

दोसरों कि अरस्तू नें काव्य के अतिरिक्त चित्र, संगीत आरनियो पर विचार करलें छै आरो चित्र-संगीत में तें अनुकरण के ही प्रधानता होय छै।

तेसरों अरस्तू के काव्य विवेचन त्रासदी सें जुड़लें होलें छै। त्रासदी में अनुकरण के ही तें प्रधानता होय छै, त्रासदी के पात्र मूल नाम के कार्य के अनुसरण करै छै।

आरो चौथों कारण ई छेकै कि ग्रीक भाषा में कवि लेली पोएतेस शब्द ऐलों छै, जेकरो अर्थ होय छै कर्ता, मतर कवि आपनों काव्य में जे घटना के वर्णन करै छै, ऊ घटना (युद्ध आरनी) के कर्ता नै होय छै, वै तें बस अपनों काव्य में ऊ घटना कें संयोजित करै छै, अनुकरण करै छै, ऊ मात्र अनुकर्ता होय छै।

ई बात ठीक छै अरस्तू के काव्य-संबंधी विवेचन में अनुकरण पर पूर्ण प्रकाश नै छै, मतर डॉ. बाली नें अरस्तू द्वारा बतैलें काव्य-विषय के तीन रूप—१. प्रतीयमान रूप, २. संभाव्य रूप, ३. आदर्श रूप में पहलों कें छोड़ी, दू शेष में अनुकरण के कुछ विशेष अर्थ अवश्य संकेतित छै, कैन्हे कि संभाव्य आरो आदर्श रूप अनुकरण के सर्जनात्मक पक्ष कें ही उजागर करै छै।

फेनु यहू बात छै कि त्रासदी सें अरस्तू जॉन आनंद के बात करै छै, ऊ त्रासदी के घटना सें की संभव हुए पारें, ऊ तें घटना यानी वस्तु के विशेष विन्यास सें संभव हुए पारें, यै सब सें स्पष्ट छै कि अरस्तू के अनुकरण शब्द पूर्व सें प्रचलित अर्थ सें संबंध रखैवाला नै छेकै।

अरस्तू नें कथानक के संबंध में विचार करते हुए जे एकरो प्रकार-भेद बतैने छै आरो ऐतिहासिक कथा सें बेसी दंतकथा कें महत्व देलें छै, कैन्हें कि यहाँ संभाव्य के बात होय छै। आबें जों गंभीरतापूर्वक यै पर विचार करलें जाय तें ई बात स्पष्ट होतै कि अरस्तू अनुकरण में आरो मतलब रखै छेलै, ई ऊ अर्थ में नै छै जे हमरा प्लेटो के अनुकरण सें मिलै छै। प्लेटो सृष्टि कें विचार के अनुकृति मानै छेलै आरो विचार

कें सत्य। कवि कविता में सृष्टि के अनुकरण करै छै, यै किसिम सें कविता सत्य सें काफी दूर होय छै, ऊ अनुकरण के अनुकरण छेकै।

वहीं अरस्तू जबें संभाव्य आरो आदर्श के बात करै छै कि तें साफ प्रकट होय छै कि कविता सिर्फ अनुकरण भर नै छेकै, वैमें केन्हौं-नै-केन्हौं कें कवि रों विचार आरो कल्पना भी जुड़लौं रहै छै, जे सहृदय के आनंद के कारण भी बनै छै।

लॉगिनुस रों उदात्त तत्व

ईसा रों तीसरी सदी के आसपास पाश्चात्य काव्यशास्त्री लॉगिनुस नें काव्य के उदात्त तत्व पर बहुत विस्तार सें विचार करलें छै, जे हिनकों निबंध 'पेरिइप्सुस' में प्रकाशित छै। कहलौं तें यहू जाय छै कि हिनकों पहलें यूनान के कोय दार्शनिक नें ईसा रों पहिलौं सदी में उदात्त तत्व के बात करलें छेलै, जेकरों मतलब काव्य के गरिमामय शैली सें छेलै।

जे हुएँ, लॉगिनुस नें उदात्त तत्व पर महत्वपूर्ण प्रकाश डालतें हुएँ एकरा विवेचन कें केन्द्र में लानी देलकै, यैमें कोय शक नै।

हिन्दी के प्रख्यात आलोचक डॉ. नगेन्द्र नें लॉगिनुस के काव्य सिद्धांत पर एक पुस्तक लिखलें छै, जेकरों नामे छेकै 'काव्य में उदात्त तत्व'। यै पुस्तक में डॉ. नगेन्द्र नें लॉगिनुस के उदात्त तत्व के दू पक्ष बतैलें छै—एक तें मोटा मोटी भाव पक्ष छेकै, जेकरा में उदात्त भाव पर विचार होलौं छै; दोसरों शैली पक्ष, जैमें अभिव्यक्ति के साधन पर विचारलौं गेलौं छै।

यहाँ ई दोनो पक्षों कें ठीक-ठीक समझना जरूरी छै।

लॉगिनुस नें भाव कें भी उदात्त आरो अनुदात्त, दू वर्ग मानतें हुएँ लिखलें छै कि हर्ष, उत्साह, संभ्रम (औत्सुक्य) आरनी हेनौं उदात्त भाव के भीतर आवै छै, जे आत्मा के उत्कर्ष के कारण होय छै; एकरों विपरीत शोक, भय, आरनी हेनौं भाव होय छै, जे आत्मा के उत्कर्ष कें हरण करी लै छै। उदात्त अनुभूति (भाव) सें ही आत्मा अभिभूत होय कें असीम आनंद के प्राप्ति करै छै।

उदात्त भाव के उत्कर्ष में उदात्त शैली के योग होय है, यही सैं लोंगिनस नैं काव्य के शैली पर विचार करते हुए अलंकार के विविध रूपों पर प्रकाश डालनें है, जैमें 'विस्तारणा' भी एक अलंकार है।

विस्तारणा मानी, कोय विषय के हेनो अंकन कि अधूरा नै लागे, ओकरो सब अंग-उपांग दिखें।

विस्तारणा के अतिरिक्त शपथोक्ति, प्रश्नोक्ति के दोसरो-तेसरो अलंकार के रूपों में हिनी देखलें है। हिनको मोताबिक शपथ के साथ कहलें कथन सैं उदात्त के संचार होय है; जेना प्रश्न-पर-प्रश्न आकि प्रश्नोत्तरवाला कथन सैं शैली में दीप्ति (चमत्कार) के सृजन होय है।

ई सब अलंकारो के बादो लोंगिनस नैं कुछ आरो अलंकार दिस उदात्त शैली लें ईशारा करलें है, जेना विपर्यय, प्रत्यक्षीकरण, दुहराव, सार, पर्यायोक्ति, रूप परिवर्तन, हेने अलंकार छेकै। आचार्य शिवबालक राय नैं ई सब अलंकार के स्पष्ट करते लिखलें है कि विपर्यय वहाँ होय है, जहाँ शब्द या विचार के सहज क्रम सैं नै रखी के उलट-फेर सैं रखलें जाय; होने के प्रत्यक्षीकरण कोय वस्तु के हेनो चित्रण सैं है कि वर्ण्य विषय जीवन्त होय उठें।

कोय बात के बार-बार दोहरैला सैं कथन में एक चमत्कार आवी जाय है।

'सार' कोय वस्तु के उत्तरोत्तर उत्कर्ष के चित्रण-विधान छेकै, जेना पर्यायोक्ति कोय वर्ण्य वस्तु के चमत्कार के साथ प्रस्तुति करवो छेकै। 'रूप परिवर्तन' पुरुष, वचन, लिंग, आरती में रूप परिवर्तन छेकै, जेकरा सैं कथन के सौन्दर्य में वृद्धि हुए।

लोंगिनस नैं शैली-सौन्दर्य वास्ते भाषा के सौन्दर्य पर बल देलें है। भाषा के सौन्दर्य सैं मतलब काव्योचित शब्द प्रयोग सैं है। सुन्दर शब्द के प्रयोग काव्य के उदात्तता में वृद्धि करै है।

भाषा के अतिरिक्त उदात्त के सृजन लेली लोंगिनस नैं रचना-विधान पर भी कम बल नै देलें है। रचना-विधान सैं सीधे-सीधे यही मतलब छेकै कि काव्य में जे भाव-विचार, भाषा के प्रयोग होलें है, ओकरा में सामंजस्य है कि नै। जो नै है, ते हेनो काव्य में उदात्त तत्व के सृजन

नै हुँ पारें !

आई. ए. रिचर्ड्स

कला रों क्षेत्र में बीसवीं सदी रों आई. ए. रिचर्ड्स मैथ्यू आर्नोल्ड के ई विचार सें प्रभावित छेलै कि काव्य जीवन लेली होय छै।

यहाँ ई बात कें सबसें पहलें बताय देना जरूरी छै कि रिचर्ड्स मनोविज्ञान आरु अर्थशास्त्र के क्षेत्र सें ऐलों छेलै, यही कारण छै कि हिनकों आलोचना संबंधी दृष्टिकोण पर ई दोनो क्षेत्र के प्रभाव साफ-साफ देखलौ जावें सकै छै।

यहू बताय के जरूरत नै छै कि रिचर्ड्स के कला सिद्धांत के पहलें 'कला' लेली हेनौ सिद्धांत के बड़ी बोलवाला रहै, जहाँ जीवन पर ओकरो सद्प्रभाव-दुष्प्रभाव के कोय बाते नै उठी रहलौ छेलै। रिचर्ड्स के मूल्य सिद्धांत सबसें पहलें यहा कला-संबंधी विचार कें झकझोरै में सफल होलै, आरु यहा कारण रिचर्ड्स आधुनिक युग के साहित्यशास्त्री सिनी के बीच आपनौ प्रभावपूर्ण स्थान रखै छै।

जेहनौ कि पहले कहलौ गेलै कि रिचर्ड्स मनोविज्ञान सें बहुत प्रभावित छेलै, यही लेली हुनी भाव या अनुभूति के महत्व स्वीकारतें हुँ ई कहलौ छै कि कलाकार के काम ऊ अनुभूति कें अंकित आकि चिर प्रभावी रूप में प्रस्तुत करी देवौ होय छै, जेकरा वैं सबसें अधिक मूल्यवान समझै छै। हेनौ कृति पढ़ी वैं अन्य आवेग, जे अस्त-व्यस्त अवस्था में आदमी के मनौ में होय छै, व्यवस्थित होय उठै छै।

रिचर्ड्स नैं मूल्यवान अनुभूति के रूपांकन आरु अस्त-व्यस्त अनुभूति में सामंजस्य के बात कही कें एक तरह सें टामस लव पीकॉक के ऊ मत के खंडन करलौ छै कि बढ़तें हुए बौद्धिकता के युग में नै के कोय मूल्य नै रही गेलौ छै।

पीकॉक नैं जॉन विज्ञान, आरु बौद्धिकता के बात उठाय कें कविता के इतिहास कें लौहयुग, स्वर्णयुग, रजतयुग, पीतल युग में बाँटी कें कविता के व्यर्थता सिद्ध करतें हुँ कहलकै कि जे बुद्धि के उपयोग, उपयोगी वस्तु के सृजन लेली हुँ पारै छै, ओकरा कविता लें खर्च करना

मूर्खता ही ठेकै। कैएक विद्वान तें यही मानै छै कि रिचर्ड्स नें कविता कें मूल्यवान सिद्ध करै लेली ही अपनों मूल्य सिद्धांत कें स्थापित करलकै।

यहाँ ई जानी लेना चाही कि मूल्य की ठेकै? मूल्य के सीधा-सीधा अर्थ ऊ वस्तु के गुण ठेकै, जे केकरो इच्छा कें पूर्ति सें संतुष्ट करै पावें। तबें रिचर्ड्स के मूल्य सिद्धांत के यहा अर्थ होलै कि काव्य आकि कलाकार कें हेनो अनुभूति, जे अधिकतम समाज कें अधिकतम सुख पहुँचावें पावें।

एकरो लेली भाषाहो कलाकार कें हेनो चुनना चाही, जे संप्रेषण में दिक्कत नै पैदा करै। यही कारण छै कि ईवर आर्मस्ट्रोंग रिचर्ड्स नें काव्य के भाषा शैली पर विचार करलें छै, जैमें छंद-लय आरनी भी शामिल छै। यहाँ ई बात बताय देना जरूरी छै कि संप्रेषण के सामान्य अर्थ प्रचलित छै—कवि या कलाकार के अनुभूति कें सहृदय तक पहुँचवो, काव्य में ई काम भाषा के माध्यम सें होय छै, यै सें रिचर्ड्स नें छंद-लय आरनी पर विचार करने छै।

यै ठां ई बताय देवो जरूरी नै छै कि रिचर्ड्स संप्रेषणीयता लेली कुशल अभिव्यक्ति कें जरूरी मानै छै, बलुक यहू बातों पर बल दै छै कि ई प्रभावी अभिव्यक्ति लेली कलाकार कें बहुत सजग रहै के जरूरत नै छै। हिनको अनुसार संप्रेषण के प्रक्रिया एक अचेतन प्रक्रिया ठेकै आरो जे कलाकार में निरीक्षण शक्ति जत्तें तीव्र होय छै, ऊ आपनों अनुभूति कें आन मनो के अनुभूति के समरूप करै में ओतन्है सक्षम होय छै। अनुभूति ठीक-ठीक सें संप्रेषित हुएँ पावें, यै लेली रागात्मक भाषा के महत्व कें रिचर्ड्स स्वीकारै छै अलंकार-रूपक आरनी कें। केन्हें कि वैज्ञानिक भाषा तें सूचनात्मक, निर्देश करैवाला भाषा ही होय छै। आरो एक बात कि रिचर्ड्स संप्रेषण लेली सामाजिक के प्रतिभा के भी बात करने छै, तभियो सहृदय कें लगै पावें कि कलाकार के अनुभूति हमरे अनुभूति ठेकै।

आखिर में ई बताना भी बहुत जरूरी होतै कि रिचर्ड्स के मूल्य आरो संप्रेषण सिद्धांत आलोचना के शिकार नै होलो छै, से बात नै छै—खूब आलोचना होलो छै। आलोचक वाटसन नें तें यहाँ तक कही देलें छै कि रिचर्ड्स के सिद्धांत भयंकर रूप सें दोषपूर्ण छै। तभियो ई

बातों से इनकार नै करलौ जावै पारै कि रिचर्ड्स के काव्य-संबंधी सिद्धांत अपनौ कुछ कमजोरी के बादो साहित्य के दै वास्तै बहुत कुछ राखै छै।



आलोचना

संस्कृत काव्यशास्त्र में आलोचक के भावक कहलौं गेलौं छै। राजशेखर कृत काव्यमीमांसा में भावक के संबंध में विस्तार सँ वर्णन मिलै छै। आखिर भावक केकरा कहलौं जाय छै, तँ एकरौं उत्तर में ई कहलौं जैतै कि कवि के काव्य के मूल्यांकन करवौं आलोचना कहावै छै आरो काव्य के मूल्यांकन करैवाला केँ आलोचक यानी भावक।

आलोचक के प्रकार आरो गुण

काव्यप्रकाश में आचार्य राजशेखर नें भावक यानी आलोचक के चार प्रकार बतैलौं छै :

- (१) आरोचकी
- (२) सतृणाभ्यवहारी
- (३) मत्सरी
- (४) तत्वाभिनिवेशी

कोय शक नै कि भावक केँ ई चारो प्रकार ओकरौं व्यक्तित्व केँ केन्द्र में रखी केँ करलौं गेलौं छै।

(१) आरोचकी : पहलौं कोटि के आलोचक यानी आरोचकी केँ कोइयो रचना पसंद नै होय छै। हर कृति में कोय न कोय खोंट निकालवौं आरोचकी के आदत होय छै।

(२) सहष्णाभ्यवहारी : हेनौं आलोचक जे रचना के गुण-दोष बताय के बदला खाली 'वाह-वाह' करलकौं, एकरा सँ बेसी कुछ नै।

(३) मत्सरी : हेनौं आलोचक जे खास करी केँ जे श्रेष्ठ कृति के ईर्ष्यावश दोष दिखैतें-गिनैतें रहै छै मत्सरी।

(४) तत्वाभिनिवेशी : आलोचक में तत्वाभिनिवेशी ही हेनौं भावक होय छै, जे निष्पक्ष रूपों सँ काव्य के मूल्य, गुण-दोषों के बारे में बतैलौं करै

छै ।

हेनों तत्वाभिनिवेशी आलोचक होय वास्तें आलोचक में ई सब गुण के होना जरूरी छै :

(१) पहिलें तें यहा जरूरी छै कि ऊ सहृदय हुएँ। ठिकके कहलौं गेलौं छै कि जों हेनों नै होतै तें ऊ रचना के साथ अपनों रागात्मक संबंध नै बनावें पारतै। खाली राग-द्वेष आकि पूर्वाग्रह सें भरलौं होतै।

(२) आलोचक में निष्पक्षता के गुण के होना बहुत जरूरी छै। एकरों अभाव में सर्वगुणसंपन्न कृतियों के आलोचक हीन बतावें पारें आरो मूल्यहीन, शिल्पहीन रचना के सर्वश्रेष्ठ कृति बतावै में नै चुकतै।

(३) आलोचक होय लेली यहू बहुत जरूरी छै कि ओकरों ज्ञान सब किसिम सें विस्तृत रहें। ओकरा हर विषय के गंभीर जानकारी रहें, आरो हेनों गुणों सें संपन्न आलोचक ही गुणी आलोचक कहावें पारें।

प्रसिद्ध उपन्यासकार रसूल हमजातोव नें 'मेरा दागिस्तान' में आलोचक के निम्नांकित गुण बतैनैं छै :

(१) आलोचक हमेशा ही खराब के खराब आरो अच्छा के अच्छा कहें।

(२) जेकरों तारीफ करों, बाद में ओकरे खराब नै कहों।

(३) राई के पहाड़ नै बनावों आरो पहाड़ के राई नै।

(४) किताब में जे छै ओकरे चर्चा करों, बाहर के नै।

(५) अपनों विचार के पुष्टि लेली ढेरे विचार जौरों नै करों।

(६) समझै लायक भाषा में विचार रखों।

(७) जे खुद नै समझों, नै कहों।

(८) ज्ञानी बनै के ढोंग नै करों।

भले रसूल नें ई सलाह रूपों में कहलें रहें, ई सब आलोचक के गुण होना चाही।

आलोचना के प्रकार

धीरेन्द्र वर्मा, ब्रजेश्वर वर्मा, धर्मवीर भारती, रामस्वरूप चतुर्वेदी, रघुवंश द्वारा संपादित हिन्दी साहित्य कोश (भाग १) में आलोचना के

विभिन्न प्रकार पर विस्तार से प्रकाश डाललें गेलों हैं। जै में निम्नांकित प्रमुख हैं :

(१) **सैद्धांतिक आलोचना** : काव्यशास्त्र के सिद्धांत पर विवेचना करवों ही सैद्धांतिक आलोचना कहावै है। साहित्य आरो ओकरो अंग, काव्य के गुण-दोष के विवेचना ई किसिम के आलोचना के अंग होय है। सुमन सूरों के 'अंगिका काव्यांग' एकरों उदाहरण छेकै।

(२) **व्यावहारिक आलोचना** : व्यावहारिक आलोचना में कोइयो साहित्यिक कृति के गुण-दोष, ओकरों मूल्य पर विचार करलें जाय है। ई किसिम के आलोचना के मार्ग व्याख्यात्मक भी हुएँ पारें, प्रभावात्म भी हुएँ पारें।

(३) **व्याख्यात्मक आलोचना** : व्याख्यात्मक आलोचक ऊ किसिम के आलोचना छेकै, जैमें कृति के भीतर तांय प्रवेश करी केँ ओकरों गुण-दोषों के खोज करलें जाय है, जबकि प्रभावात्मक आलोचना में ऊ कृति के प्रभाव के सुव्यवस्थित विवेचन होय है, जे कोय कृति केँ पढ़ला के बाद मनो पर पड़े है। डॉ. तेजनारायण कुशवाहा के आलोचना हेने किसिम के है।

(४) **तुलनात्मक आलोचना** : ई किसिम के आलोचना में दू कृति आकि कृतिकार के व्यक्तित्व आरो काव्योपलब्धि पर तुलनात्मक ढंग से विवेचन होय है। अंगिका में अभी ई किसिम के आलोचना के अभावे है, जों डॉ. अमरेन्द्र के लिखलें 'दू पाटन के बीच में' केँ अलग करी देलें जाय।

(५) **शास्त्रीय आलोचना** : काव्यशास्त्र के आधार पर होयवाला आलोचना- पद्धति के शास्त्रीय आलोचना कहलें जाय है। कागा की संदेश उचारै के आलोचना एकरों उदाहरण छेकै।

(६) **मनोविश्लेषणात्मक आलोचना** : ई किसिम के आलोचना में

मनोविज्ञान के ही मुख्य रूप से आधार बनैलें जाय छै। आधुनिक समय में ई बात वैज्ञानिक तौर पर मानी लेला के बाद कि कोइयो कलाकृति कलाकार के अवचेतन, अचेतन, कुंठा, दमित इच्छा के ही परिणाम छैकै, तें कृति में कृतिकार के अचेतन मन के खोज शुरू होलै। डॉ. अमरेन्द्र के आलोचना 'कागा की संदेश उचारै' में ई किसिम के आलोचना के प्रभाव देखलें जावें पारें।

(७) ऐतिहासिक आलोचना : ई किसिम के आलोचना में कृतिकार के देशकाल के परिस्थिति आरो कृति पर पड़लें ओकरो प्रभाव पर गहन विचार करलें जाय छै।

(८) निर्णयात्मक आलोचना : निर्णयात्मक आलोचना में आलोचक न्यायाधीश के भूमिका में रहै छै। कोय कृति के गुण-दोष पर विचारला के बाद आलोचक अपनो निर्णय जज नाँखी दै छै। सच पूछो तें ई किसिम के आलोचना कोय किसिम से उत्कृष्ट नै मानलें जावें सकै, जेकरे कारण आलोचना के ई मार्ग साहित्य में विकसित नै हुए पारलै। अंगिकौ में एकरों अभावे छै।



बिम्ब-योजना

बिम्ब की छेकै? ये विषय पर सुमन सूरु के काव्य पर विचार करते हुए डॉ. मनोज कुमार पाण्डेय ने आपनों शोध-प्रबंध 'महाकवि सुमन सूरु : व्यक्तित्व आरो कृतित्व' पर विस्तार से विचार करलें छै। वही आधारों पर ई कहलें जैतै कि वास्तव में बिम्ब इन्द्रिय द्वारा अनुभूत संवेग के शब्दचित्र छेकै, जेकरा कवि आपनों कल्पना के सहारा से निर्मित करै छै, तें जों ई कहलें जाय छै कि बिम्ब ऐन्द्रिक अनुभव के अभिव्यंजना छेकै, तें गलत नै छै। आलोचक आचार्य शिवबालक राय जी कहै छै कि ई अनुभव दृष्टि, श्रुति, गंध, स्पर्श आरो आस्वाद के माध्यम से कवि मानस में आविर्भूत होय छै। आपनों मानस में पड़लें कुप्रभाव सिनी के वें फेनू आहूत करै छै। संक्षेप में कहलें जाय तें काव्यमूलक बिम्ब कोय एक संवेदन के रिकॉर्ड छेकै, प्रमाण छेकै।

आरो काव्य में ई बिम्ब के बहुत महत्व छै। हेना के भारतीय काव्यशास्त्र के पंडित सिनी ई बिम्ब लेली रीति, ध्वनि, आरनी के ही प्रमुख बतैने छै, मुदा जों देखलें जाय, तें यहाँ बिम्ब के ई सबसे कम महत्व नै आंकलें जावें सकें। ऊ बिम्ब ही छेकै जे रस प्रतीति में सहयोग करै छै। कोय भी अमूर्त अनुभव जबें रूप धरी के सम्मुख होय छै, तें पाठक कवि के अनुभव, अनुभूति के सहजता से ग्रहण करें पारै छै। कहै के जरूरत नै छै कि सूरु जी आपनों काव्य में कैन्हें बिम्ब के सहयोग हर जगह पर लै छै।

सुमन सूरु के काव्य में ऐलों बिम्ब के जों हमें अलग-अलग खटालों में रखै के कोशिश करिये, तें प्रयुक्त बिम्बों के निम्नांकित वर्ग में बांटलें जावें सकै छै,

(क) वस्तुवर्गीय बिम्ब

(ख) अलंकृत बिम्ब

(ग) मानस बिम्ब

(घ) संवेद्य बिम्ब

संवेद्य बिम्ब के भी चाक्षुष, घ्राण, स्पर्श, नाद, स्वाद बिम्बों में

बांटलें जावें सकै छै, बांटलें जैतै भी ।

क. वस्तुवर्गीय बिम्ब

डॉ. के. एम. रामानाथन के मोताबिक वस्तु बिम्ब ऊ होय छै जे यथार्थ के रेखासिनी पर खाड़ों करलें जाय छै । वस्तु रों यथार्थ आरों अनलंकृत चित्रण ई वर्ग के बिम्ब के प्राथमिक विशेषता होय छै । कवि खाली वस्तुगत चित्रण सें ही बिम्ब खाड़ों करी दै छै । हिन्दी प्रगतिवादी कविसिनी में ई प्रकार के बिम्ब के अधिकता देखलें जावें सकै छै । कहै के जरूरत नै छै कि अंगिका के ई महाकवि के काव्यों में ई किसिम के बिम्ब के कमी नै छै । कुछ उदाहरण नीचें प्रस्तुत छै,

(क) यै पतझर के हवा छुअलकै भीतर तक

ई पतझर के मौसम सगरो छैलें छै ।

झरलै सबटा खोर घोर सब ठूठ भेलै

चेहरा अजब उदास मलिन छै गामों के

ई नै समझों यै पतझर के मौसम के

झरलै खाली पत्ता महुआ, आमों के ।

रोगनी गेलै बिलाय ओप सब दूर भेलै

बुढ़वा-जुआन, बच्चा-बच्चा कुम्हलैलें छै ।

कोड़रा-करमी के साग भाग मानी-मानी

नांची-नांची के बुतरू सब चभलाबै छै

सूनो देहरी पर बिना काम बैठी-बैठी

घर के मलकिनियां भुखलें पहर गंमाबै छै

(ख) चैतों के दुपहरिया

झहर-झहर पछिया बतासों में बोलै छै पतझरिया

पिपरो के ठारी पर छाया में मैना छै मूं बाबी

फेड़ी पर बैठलें छै परदेशी दूरों के लू पाबी

चक्-चक्-चक् नाचै छै रौदी के गूजरिया ।

आमों के सुखलें रं मंजर पर लट्टू छै भमरा बिहानै सें

चुट्टी के खोन्हा उजाड़ै लें लागलें छै बच्चा जी जान्है सें

गाछी सें उतरी कें धरती पर भागै छै गिलहरिया

पछियारी ओसरा पर दादी छै माथों उवारी कें
 बीछै छै भौजी नें लीखर सब
 केश कें झारी-बिथारी कें
 ठामे ठा जमलों छै पचीसी, उछलै छै पियरिया ।

ख. अलंकृत बिम्ब

अलंकार और अलंकार आश्रित बिम्ब में जे अन्तर होय छै, ऊ ई छेकै कि अलंकारवादी कवि के ध्यान मुख्य रूप से अलंकार के अलंकरण पर ही विशेष ध्यान होय छै, मतुर जहां अलंकृत बिम्ब होय छै वहाँ प्रस्तुत आरो अप्रस्तुत द्वारा बिम्ब के प्रमुखता देलों जाय छै, यै कारणे यहाँ कुछ हेनों अप्रस्तुत विधान होय छै, जे बोधगम्य हुएँ, क्लिष्ट नै हुएँ । डॉ. के. एम. रामनाथन नें अलंकृत बिम्ब के बारे में यहा कहलें छै ।

कहै के जरूरत नै छै कि सुमन सूरों के काव्य में हेनों बिम्ब के विधान प्रचुरता में होलों छै । कवि ने उपमा अलंकार के सहारे एतें सुन्दर-सुन्दर अलंकृत बिम्ब उपस्थित करने छै कि काव्य लालित्य चरम पर पहुँची गेलों छै । कुछ उदाहरण नीचें प्रस्तुत छै,

(क) दूध-चांदनी के फेनों रं

झलमल गंगा के धारा

(ख) खाड़ों होलै भीष्मों के आगू रोक़ी कें राह

मानों सिंहों के बेटाँ छेकलक महा बराह

(ग) खगलों दानी राजा रं खाड़ों छै

आमों के विरवा उदास

(घ) मनों में जेना कि उमड़ै छै घुमड़ै छै

लब्बों-पुरानों विचार,

तेन्है आकाशों में आबै छै, जाय छै

बादल पर बादल सवार

००

देरी सें तोड़ै छै चुप्पी कें, टपकी कें,

पातों पर पातों के बूंद,

आँखी के कोरों सें जेना बहराय छै

धीरवती दुखिया के छन्द ।

ग. मानस बिम्ब

मानस बिम्ब वहाँ होय छै जैठां भाव आकि विचार के ही प्रधानता होय छै। भाव या विचार अमूर्त होय छै, यही लें कवि ओकरा रूप दै लें बिम्ब के विधान करै छै। चूँकि यहाँ भाव आकि विचार के ही प्रस्तुत करै लेली बिम्ब विधान होय छै, यैलें हेनो बिम्ब के मानस बिम्ब कहना अनुपयुक्त भी नै छै ।

भाव आरो विचार बिम्ब हेना तें दोनों मानस बिम्ब के अन्तर्गत आवै छै, मत्तुर जेना कि नामे सें पता चलै छै; जहाँ एक में भाव के प्रधानता होय छै तें दूसरा में विचार के । नीचे मानस बिम्ब के कुछ उदाहरण प्रस्तुत छै,

पिया दोरस्सों दिन
कखनू तें फूल लागै कखनू तें पिन
पिया दोरस्सों दिन ।

कखनू तें लोरी के नींद बनी जाय छै
कखनू तें ननदी रङ झोली जगाय छै
कखनू तें माथा पर मोगल के ऋण
पिया दोरस्सों दिन ।

कखनू तें भौजी के चुटकी सन लागै
कखनू ननदोसी के नेह बनी आवै
क्षणें छै गोतनी तें क्षणें सौतिन
पिया दोरस्सों दिन ।

क्षणें हँसावै छै क्षणें कनावै
हाँसै की मइये, की सासू रिसियावै ?
नै तें हिरनौटा ई नै तें बाधिन
पिया दोरस्सों दिन ।

घ. संवेद्य बिम्ब

संवेद्य बिम्ब ऊ किसिम के बिम्ब छैकै जे मनुष्य के इन्द्रिय संवेदन, अनुभवों सँ जुड़लौ होय छै । मन के प्रभावित करै वाला प्रमुख इन्द्रिय में श्रुति, त्वचा, चक्षु, जिह्वा आरो नासिका होय छै । शब्द, स्पर्श, रूप, रस आरो गंध यहँ सब इन्द्रिय के विषय होय छै । ज्ञानेन्द्रिय सिनी के आधारों पर बिम्ब कें निम्नांकित भेदों में बांटलौ गेलौ छै,

- (क) चाक्षुस बिम्ब,
- (ख) श्रौत बिम्ब,
- (ग) घ्राणमूलक बिम्ब,
- (घ) रसनामूलक बिम्ब,
- (ङ) त्वकमूलक (स्पर्श) बिम्ब ।

(क) चाक्षुष बिम्ब

चाक्षुष बिम्ब विधान करौ अन्तर्गत वस्तु विशेष करौ चित्रांकन करतँ वक्ती ओकरो रूपाकृति के स्पष्ट व्यौरा प्रस्तुत करलौ जाय छै । एक उदाहरण देखियै,

पानी सँ ढलमल मेघो के सरँगो में बारात
सूरज देव बिलैलै हेनो दिन्हो लगै छै रात
मेघ छिकै या कारों-कारों राकस करै छै खेल
बिजुरी नेँ ई, दाँत छिकै राकस के । मिलै छै मेल
करिया मेघो रों बीचो मेँ बिजुरी लागै केहनो
कोय सिलोटी पर टेढ़ो रेखा खिचले छै जेहनो
कभी झाकसो, कभी तेँ बूँदा-बूँदी के अठखेल
देखले छेलियै हेनो नै धरती-सरँगो के मेल
बिजुरी करौ मशाल जलैनेँ, ठनका-तुरही साथ
बूँदा-बूँदी-झाकसो-अन्धड़-पानी के बारात
आय सरँग शिव हेनो लागै—जटा बिखरलो छै
फूले लाबा, आय धरती रों खोचा भरलो छै
बाप बनी केँ सरँग करै छै पहलो कन्यादान
नेहो के लोरो सँ बेटी रों भीजे छै प्राण

हू-हू हवा चलै छै केहनोँ गाछ डोलैनेँ-झाड़नेँ
 ओकरो जोड़ उखाड़नेँ जौनेँ भीतर छेलै गाड़नेँ
 पछिया के झोंकोँ सेँ लम्बा गाछ हिलै छै हेनोँ
 निसाँ चढ़ैनेँ आरी-बारी लोग झुमै छै जेहनोँ
 भाव उतरला पर जेना कि भगत चलै छै चाल
 लम्बा गाछोँ के होय रहलोँ छै होने कुछ हाल

(ख) श्रौत बिम्ब

नाद सौन्दर्य केरों प्रेषणीयता द्वारा जहां इच्छित प्रभाव करलों
 गेलों रहें वहाँ श्रौत आकि श्रावण बिम्ब हुऐ छै । एक उदाहरण नीचें छै,
 शरद-खंजन फिरै
 गल्ला सें गल्ला मिली कें दुन्हू
 की-की गलगल करै ।

धानों में ढुकलों की मारै छै गपसप
 निकली, पोखरिया में गोड़ करै छै छपछप
 कमलों पर फुदकै कोय कोय्यो डरै
 शरद-खंजन फिरै ।

सारस कें दुषनें छै कारण्डव भोरे
 जानी है—हँसै की पानी थपकोरै
 बगुलौ लै चुटकी—कोय कत्तो जरै
 शरद-खंजन फिरै ।

(ग) घ्राणमूलक बिम्ब

पिया फागुन के जोर ।
 बोहों रड बैहलों छै पटवासी-मोर
 पिया फागुन के जोर ।

जे रड उधियैलों छै मंजर के इत्तर
 गमकै छै मालती पर मालती के लत्तर

महुवे सन महकै मन ई भोरमभोर
पिया फागुन के जोर ।

बीये रड गाछी में फूलों के ढेरी
हाँसै छै सब्बे टा ठारी कें घेरी

(घ) रसनामूलक बिम्ब

पिया जेठों के लू
जानों लें बनलों छै सौतिन यहू
पिया जेठों के लू ।

हेना तें गमगम छै बारी-फुलवारी
महुआ के, कटहल के, आमों के ठारी
हमरा लें कस्से सब जेना कहू
पिया जेठों के लू ।

(ङ) त्वकबिम्ब (स्पर्शबिम्ब)

शिशिर है की करै ?
चाँदे नै, दीये रड सुरजो बरै
शिशिर है की करै ?

पानीं ठहारों के पारो नै पावै
कन्नें नुकैलै ? नै मछली दिखावै
रेहू नै, मिरका नै, गेंची गरै
शिशिर है की करै ?

मुड़लों धनखेती में पाला के रूई
देहों में गत्थी जाय शितलहरी सूई
खोरनी नै, बोरसी कें हात्तैं हरै
शिशिर है की करै ?

केसर-कस्तूरी नै, रूई नै पिया
ई ऋतु ओकरा लें बेरथ, धुर-छिया
आरो यें जम्में रड ओकरा धरै
शिशिर है की करै ?

गौन्हें के कम्बल में हम्में असकल्ली
कैहिनें नी जैवों ठहारी सें गल्ली
सब तें दुसल्लहीं में थरथर मरै
शिशिर है की करै ?

(१) स्फोट बिम्ब

स्फोट बिम्ब वहाँ होय छै, जहां तोड़-भांग आरनी के चित्र हुए ।
'उध्वरेता' के अठारमों सर्ग में हेनों स्फोट बिम्ब के कमी नै छै । एकटा
उदाहरण नीचें प्रस्तुत छै,

भाला के मारों सें हाथी रही-रही चिगवाड़ै,
हुमकी-हुमकी वीर बांकुरा दुश्मन छाती फाड़ै,
रथ के पहिया टूटै घोड़ा बेदम खाय पछाड़
पूँछ उठैनें दलनें भागै हाथी बिना सवार
गुद्दी छिलकै, कहीं बनै मुंडी सदका पिचकारी
बहै अलेरो मेघ बनी के भुरकुश भोटी झारी
रुण्ड मुण्ड बिलमी कें नांचै, भासै खाय पछाड़
हाथी के गोड़ों के नीचें कड़कड़ तड़तड़ हाड़ ।

(२) आवयविक बिम्ब

आलोचक डॉ. शिवबालक राय के मोताबिक, जैठां प्राण रों तृषा,
वासना, मिलनोत्कंठा आरनी के उत्कटता के चित्रण हुऐ छै ओकरै
आवयविक बिम्ब कहै छै। सूरु जी के काव्य में ई बिम्ब के अनेक
उदाहरण मिलै छै । नीचे इकटा उदाहरण प्रस्तुत छै,

(क) चरण छुवी कें खुशमिजाज दुर्योधन के प्रस्थान
पाण्डव-दल में खबर सुनी कृष्णों के हड़हड़ प्राण

तुरत जाय रनिवास उठैलकै कान्हा पर कृष्णा कें
दौड़ै छै जेना प्राणों लें जीयै के तृष्णा लें ।

(ख) घमासान मचलै छुटलै लहुवों के धार धरा सें
कुरुक्षेत्र के भूम लगै काली-जिह्वा कें नासें
खटखट, ठकठक खट्ट खटाखट शूल गदा के टक्कर
दौड़ै रथ चौगिर्द लगाबै हाथी-घोड़ा चक्कर ।

स्फोट बिम्ब के दूसरों उदाहरण में गति बिम्ब के उदाहरणो
मिली जाय छै, मत्तुर मुख्य रूप सें ई स्फोट बिम्ब के ही उदाहरण बनै छै ।

(३) गति बिम्ब

जोन बिम्ब सें गतिमयता रूपायित हुएँ, वही गत्तर बिम्ब होय
छै ।

उखैल भेलै
ऐंगना दुआरी चनन पिछुआरी में
बच्चा-बुतरुआ-जुआन खेलै ।
ठारी नुकैलों चिड़ैयां उड़ै छै
छपरी कबूतरी कबूतर जुड़ै छै
लेरुआ कें लागलै जे बाव
गुहाली सें एक्के उड़ानी बथान गेलै ।

(४) मिश्र बिम्ब

एतन्है नै, सुमनसूरो के काव्य में कांही-कांही मिश्र बिम्बो के
अनूठा उदाहरण मिलै छै, जहां एक्के ठियां कें एकठो बिम्ब एक्के साथ
उपस्थित छै । नीचें एक हेनो उदाहरण प्रस्तुत छै, जैमें गति बिम्ब, गंध
बिम्ब, स्वाद बिम्ब, श्रौत बिम्ब, आवयविक बिम्ब एक्के साथ उपस्थित
छै,

रही मारै छै हिलोर
अंचरबा उड़ि लहरावै ।
फागुन कटलै अन्हारि
इंजोरिया पछिया बयरिया,

गम-गम गमकै झकोरी
गुजरिया आमों के मंजरिया,
बड़ी खिनी आबै नित भोर
निगोड़ी बरजोर
कोयलिया शोर मचाबै
बीतै नी रात पराती नी बीतै
बीतै उमरिया
भूली-भूली पड़ै सब बात
नजरिया हैरै डगरिया
छन्है-छन्है सूखै छै ठोर
उमड़ि आबै लोर
ननदिया दरदो नी पाबै ।



प्रतीक-योजना

प्रतीक कें स्पष्ट करते हुवें डॉ. रामकुमार वर्मा नें एक स्थल पर लिखलें छै कि, एक्के शब्दों में ढेरे-ढेरे भावों के अभिव्यक्ति प्रतीक के निर्माण करै छै । प्रतीक केरों संबंध-शब्दशक्ति के ध्वनि-शैली सें छै, यैलें साहित्य में अर्थ-विपुलता लेली प्रतीक हमेशे प्रयुक्त होतें रहतै । जे किसिम सें मधु रों एक बूंद हजारो फूलों के सुगंध आरो मकरन्द रों संशिलट रूप छेकै, वहा भाति एक प्रतीक ढेरे-ढेरे मानव-जगत आरो वस्तु-जगत के कार्य व्यापार के संकलन छेकै । यै लेली साहित्य के इतिहास में मन्त्र सें लैकें आत्मबोध के कर्त्ते-कर्त्ते भावनासिनी यहा प्रतीकों सें उदबुद्ध होलें छै । प्रतीक व्यष्टि में समष्टि के समपोषण छेकै ।

आरो सुमित्रानन्दन पंत प्रतीक वास्तें लिखै छै कि हमरों मन जै किसिम-किसिम विचारों के सहारा सें आगू बढ़ै छै, वहा रं मानव चेतना प्रतीकों के सहारा सें विकसित होय छै । हमरों राम आरो कृष्णो तांय यही प्रकार के प्रतीक छेकै, जिनकों व्यक्तित्व में एक युग के संस्कृति मूर्तिमान होय उठै छै ।

सुमित्रानन्दन पंत नें प्रतीक के जे परिभाषा देलें छै आरो जे आगुवो कहिलें के समस्त सब्भे पात्र यहाँ प्रतीक रूप में ही उपस्थित होलें छै जे कि महाकाव्य में कवि रों अग्रवचन सें भी स्पष्ट होय छै । महाकवि सूरु लिखै छै कि चिति-सत्ता द्वन्द्वात्मक छै, घनात्मक आरो ऋणात्मक । दोनों में संघर्ष होते रहै छै, मतर लोप केकरो नै होय छै । आत्मप्रसार आरो आत्मसंकोच के ही 'उध्वरिता' कथा छेकै ।

कवि द्वारा आत्म निवेदन में कहलें ई बात सें साफ स्पष्ट छै कि यहाँ, शान्तनु, भीष्म, दुर्योधन, कर्ण, गंगा, सत्यवती सब पात्र प्रतीक के रूपों में ही उपस्थित छै, जे मानव चेतना के उर्ध्वमुखी आरो अधोमुखी चेतना के प्रतीक बनी कें उपस्थित छै ।

यै दृष्टि सें जों विचारलों जाय तें सुमन सूरु के काव्य 'सतीपरीक्षा' केरों सब पात्र भी प्रतीक रूपों में ही चित्रित होलें छै ।

जेकरा कि डॉ. अमरेन्द्र नें मिथ आरो आधुनिकता कें उजार करै के क्रम में स्पष्टो करलें छै । आगू कुछवा विचार करला के पूर्व ई जरूरी होतै कि प्रतीक के भेद पर एक दृष्टि डाली लेलों जाय । विद्वानें प्रतीक पर विचार करतें हुवें, प्रतीक के निम्नांकित भेद बतौलें छै,

१. धार्मिक प्रतीक
२. मनोवैज्ञानिक प्रतीक
३. सामाजिक प्रतीक
४. अनेकार्थी प्रतीक
५. राजनीतिक प्रतीक
६. देशगत प्रतीक
७. व्यक्तिगत प्रतीक

१. धार्मिक प्रतीक

खिली गेलै गेना रोँ सौंसे बदन में
 करोड़ों कमल कखनी, केना केँ क्षण में !
 खुली गेलोँ मुन्हन छै अमरित कलश रोँ
 चलै झटकवा चारो दिश सेँ छै रस रोँ
 कि बरसो नै बरसै छै है रँ के हद-हद
 भिंगी गेलोँ गेना छै अनहद तांय सरगद

२. मनोवैज्ञानिक प्रतीक

की करतै कालों रोँ तक्षक-करैत ?
 तन जों परीक्षित छै मन शुक पुरहैत

एक बीन बाजै छै बरसौं सेँ—एक रस
 रोम-रोम बान्हीं केँ करनें छै हमरा बस
 बीनों संग झूमै छी, हेकरोँ नै चेत ।

जेठों पर गिरलै आषाढ़ों रोँ हाथ
 बरी गेलै कातिक अमस्या रोँ रात
 पानी रँ बही गेलै आगिन रोँ रेत ।

रेतों रों बीचों सँ गजुरै छै गीत-गीत
गूँजै बहियारी में एक राग—‘प्रीत-प्रीत’
भटियावै मन—बीजू वन, खेते-खेत ।

केतकी फुलैलों छै—सौंसे वॉन गमकै छै
सात सुरों वंशी पर पायल खूब झमकै छै
हाथ जोड़ी खाड़ों छै उमरी रों प्रेत ।

३. सामाजिक प्रतीक

यहँ कहीं कसलों छै देवता तिजोरी में
काँटों रँ लोर गड़े आँखी रों कोरी में ।

डंडी पर राखी सब गीता तक तौलै छै
वै पर भी ई देखों ‘रामे-राम’ बोलै छै
राज-भोग लिखलों छै ठिक्के बरजोरी में ।

मैना देखावै नै देखै छी खोतै
भाँड़ी कबूतर रों की होलों होतै
साँपों रों चेन्हों छै देहरीये ओरी में ।

४. अनेकार्थी प्रतीक

छपरी पर गगलै छै कागा, के ऐतै ?

ऐंगनो उदामों छै । पहिलो सँ की छेलै ?
हिस्सा रों गाछ-बिरिछ काकां सब लै गेलै
जों कजायद पहुनो कोय अनचोके आविये जाय
चिंता सँ गललों जावँ—की देवै ? की खैतै ?

ठेका में पीपर आ बोर गाछ कटी गेलै
पोखर भतैलै, भैयारी में बँटी गेलै

बचलौं इनारा के पानी कदोड़ छै
कंचन रँ ठनकों टा पानी हो ! के पैतै ।

पछिया कें की कहियै, पुरबैं जी जरै
उस्सट रँ जिनगी सेँ कोमल मन हारै
मतछिमतौ मौसम तें आवै लें बाँकी छै
जेठो-बैशाखो रँ धाव हुवै चैतै ।

५. राजनीतिक प्रतीक

देखी कें समय-चाल कालो मुँह ढाँपै छै ।

हू-हू बतास बहै जेठो-बैशाखो के
पाण्डव के घोर जरी रहलौ छै लाखों के
काहूँ नै छाँव कहीं चन्दन आ पीपल रों
जरी गेलै लोंत-पात सौंसे ठो जंगल रों
प्यासलों-तपासलों सब रौदी सेँ हाँफै छै ।

पछियाँ बहियाबै छै पुरबा के रागों कें
पानियो में चैन नै छै मीनों के भागों कें
टकरावै उलका छै, पुच्छल सेँ शनियो छै
कन्हौं सेँ मंगल दिखाबै की कटियो छै
चान-सुरुज, बुद्ध-गुरु पर्वत पर काँपै छै ।

इखनी तें देवों कें देव्हें सेँ वैर छै
एना में केना सिरिष्टी रों खैर छै
काहूँ नै कृष्ण, व्यास कण्व, जनक, बाल्मीकि
शापित होय शाप दै आपन्हें में ऋषि-ऋषि
विष्णु कें भृगु ही गोड़ों सेँ चाँपै छै ।

६. देशगत प्रतीक

हेन्हें कें किरियैलों आठो याम काटे छी
नोनछोहों जिनगी रों खारचों दुख चाटे छी ।

जागै सब अनटेटलों असगुन अलेरों
पाँच बहिन विषहरी कें पड़लों छै फेरों
सपना अपैतों सब कूटे अहूरिया
बीहै दिन राँढ़ भेली किंछा बहुरिया
असनैलों रिश्ता छै भावो सबटा विषैन
जेठों के परती-पराँटों रँ फाटे छी ।

७. व्यक्तिगत प्रतीक

आँधी कें देखै लें आरो परहेज लें,
आबें जरूरी छै—खिड़की पर काँच लगें ।

की रँ लहरावै छै बाहर मेँ बिन्डोबों
धरतीं उड़ावै छै—धुरदा—कोबों-कोबों,
एकदम तपासलों लू देह-मुँह झोंसै छै
बुतरू कें जेना कोय अंगुलीमाल धौंसै छै
निर्दय-निर्मोही समय भेलै हेने कसाय,
बाँही पर कड़कड़ाय जेना कि पाँच लगें ।

है रँ बतासों मेँ गिद्धा रों मौज छै
भाँड़ी मेँ हकहक कबूतर रों फौज छै

२

ई छाप केन्हों चेन्हों
नद्दी काता में
चुनमुन चिड़िया चिकरै ।

संझबातिये सें आबें
तुलसी-चौरा की
चन्दन रों वन लहकै ।

किरयैलों चैतारों
मन्तरिया मौसम
कपसै वन-वन रीतू ।



नया गद्य-विधा

निबंध

लेख आरो निबंध में अंतर होय छै, है बात निबंध लिखै के पहिले समझी लेना चाही। लेख जों मस्तिष्क के संतान होय छै, तें निबंध हृदय आरो बुद्धि दोनों के संयोग सें ही उत्पन्न होय छै। मतलब ई छेकै कि लेख में बस तथ्य के ही प्रमुखता के साथ, साफ-सुथरा भाषा में रखलौं जाय छै, यहाँ अलंकार आकि प्रतीक के कोय जरूरत नै होय छै, जबें कि निबंध में अलंकारवाला भाषा भी होय छै, कल्पना रों उड़ान साथें कुछ हँसी- व्यंग्य के बात भी, जेकरों कारण कि लेख में लालित्य आरो मनोरंजन के समावेश होय जाय छै, भले ही साहित्यिक निबंध रहें कि राजनीतिक निबंध आकि धार्मिक निबंध कैन्हें नी रहें।

निबंध में भाषा-शैली सें कम महत्वपूर्ण स्थान उपस्थापन-विधि के नै होय छै। जेन्हों कि साहित्य के सब्भे विधा में कमोवेश पैलौं जाय छै कि एकरों आरंभ विषय के पूर्वाभास सें ही हुए, फेनु विषय कें विस्तार देलौं जाय आरो आखरी में निष्कर्षों के होना जरूरिये होय जाय छै। ई बात ठीक-ठीक समझी लेला के बाद निश्चित रूप सें निबंध-लेखन बहुत कठिन नै रही जाय छै, तहियो एक अच्छा निबंध लेखन लेली अभ्यास के सबसे बेसी जरूरत होवे करै छै।

कहानी-लेखन

कहानी-लेखन लेली सबसे पहिलें कोय प्रभावी घटना के चयन होना जरूरी छै। ओकरों बादे चरित्र, परिवेश-चित्रण आरनी आवै छै। जहाँ तक चरित्र के बात छै, वहाँ एक प्रभावी मुख्य पात्र के होनै काफी छै, बाकी बेसी-से-बेसी आरो एक-दू सहायक पात्र। अंत में कहानी के कोय भी अंग हेनो नै लगें कि कहानी सें कटलौं हेनौं छै। सब अंग हेने लगै कि ऊ सब एक-दूसरा सें जुड़लौं छै आरो वहाँ ओकरों बहुत जरूरत

छेलै। आखरी में कहानी वास्तें कसावट बहुत जरूरी छै। बिखराव होथें कहानियो बिखरी जाय छै।

संस्मरण-लेखन

संस्मरण लिखै के पहिलें आत्मकथा आरो संस्मरण के भेद जानी लेना चाही। आत्मकथा उपन्यास नाँखी बड़ों आकारों में हुए पारें कैहिने कि ऊ लेखक के जीवन के लेखा-जोखा होय छै, जबकि संस्मरण कोय व्यक्ति आकि स्थल के विशेष प्रवृत्ति या पक्ष के विशिष्ट ढंग से चित्रण होय छै, जेकरा से विषय के कोय विशिष्ट प्रवृत्ति-प्रकृति के उद्घाटन हुए पारें।

ललित निबंध

ललित निबंध वास्तव में निबंध ही छेकै। निबंध के जे अपनों विशेषता छेकै, जों ऊ सब में कल्पना आरो लालित्य के मात्रा के गाढ़ों करी देलें जाय, तें ललित निबंध के रचना होय जाय छै। यहाँ ललित के प्रमुखता होय छै। ललित के मानी होय छै सुंदर, रोचक आरो ई तत्व निबंध में कल्पना से आवै छै, तें कहलें जावै सकै छै कि ललित निबंध में कल्पना के उड़ान खूब देखलें जाय छै।

रिपोर्ताज

रिपोर्ताज अखबारी रिपोर्ट के साहित्यिक रूप छेकै, जाहिर छै कि रिपोर्ट के भाषा-शैली जहाँ विषय के सीधे-सीधे प्रस्तुत करै में विश्वास रखै छै, वहाँ रिपोर्ताज में भाषा कलात्मक आरो विषय के रोचक बनाय के प्रयास अधिक होय छै। अंगिका में रिपोर्ताज लेखन के लैके डॉ. निवासचंद्र ठाकुर आरो डॉ. अमरेन्द्र के ही जानलें जाय छै, जब कि ये विधा पर विशेष ध्यान के जरूरत छै।

□□